


DITUKU ADI KU KALVARIYO

 Twasakidila, Mwaneetu Neville. [Mwaneetu Neville udi wamba pende ne: “Akubeneshe, mwaneetu.”—Muf.] Nzambi akubeneshe, Mwaneetu Neville. Twasakidila, wa manza tente.

² Mwoyi wenu awu mu dinda emu, nwênù balunda baanyi. Edi ndyêsè bwa kwikala mwaba ewu cyakabidi ku tabernacle, mu dinda emu, bwa kukwacila Mukalenge mudimu, mu mushindu wa kuyiisha kwa Dîyi ne kusambidila babeedi. Ne mêmè ndi ne kusakidila kwâbûngî be bwa dituku edi.

³ Nenku mbinkemeshe, anu pângààbwedi apu. Mwaneetu wa balume kampana mmuseemene kûndi e kwamba ne: “Ncyêna muswe kwikala bu mwena nsudi uvwa kayi mukumbanyine wa bwena wâkondopiibwa awu to.” Mmwaneetu Wright. Mvwa mumusambidile, ne Mukalenge mmumwondo kantu ne kantu. Nenku walu kûndi, udila mwadi, bwa kundabula ku cyanza, mwikale wamba ne—ne mmuswe kusakidila Mukalenge bwa mudiye mwondopiibwe. Uvwa ujinga kwalukila bwa kwamba mêyi a kusakidila naawu. Byônsò mbiye. Udi—udi ne mubidi tumatuma mpindyewu. Tudi ne kusakidila bwa majaadiki awu.

⁴ Nenku Charlie, wêwè ne Mwaneetu Jeffries, bu nwênù mwa kwanyisha, bandilaayi lwa kuneeku nusombe pa myaba ya kusòmba idi apa eyi. Ne nwênù biine nudi beenyi baa cisaka, nenku kabyena bikengela nwikale biimane kuulu nanku awu nansha. Mwaneetu mukwabo wa balume wawa, ne Mwaneetu Wood, bandilaayi anu kuneeku. Nudi. . .Nyewu kudi myaba, myaba mikese ibidi pa cibasa mwaba ewu, nenku kabyena bikengela nwikale biimane kuulu nanku awu nansha. Ngela meeji, myaba ibidi mwab’ewu, ne, eyo, nudi bafwanyine kwikala beenyi baa cisaka bwa nwênù kulwa kusòmbela pa myaba eyi.

⁵ Tudi ne disanka bwa. . .Ngela meeji ne ke mwakambabo, musangu kampana ne: “Mvwa ne disanka paakangambilabo ne. . .” Nzambi akubeneshe, mwaneetu wa balume. [Mwaneetu wa balume kampana udi wamba ne: “Ntu mêmè anu munange kwikala pabwîpi ne muyiishi.”—Muf.] Twasakidila. Twasakidila, twasakidila. “Mvwa ne disanka paakangambilabo ne, tuye mu nzubu wa Mukalenge.” Ke dyêsè ne disanka bya mwena Kilisto, dya kuya mu nzubu wa Mukalenge.

⁶ Pandi nkenzakana, mmona balunda baanyi bàâbûngî balwe, mu dinda emu, ndi ndyumvwa mwambwibwe muulu mwa dikema kumutu kwa byôbi ebi. Ndi ne disanka dya kumona Mwaneetu wa balume ne Mwaneetu wa bakaji Dauch mwaba ewu, baa ku Ohio. Nyewu mmona Mwaneetu wa balume ne Mwaneetu wa bakaji Armstrong mundekeelu mwamwa, bende lwendu lule bafumine ku Ohio. Nzambi anubeneshe bwônsò

bwenu, nwênù peenu. Nenku, kaa, paudi anu ukenzakana, udi ubamona bààbúngì be, bifwanyine kwikala bikole bwa kubateela bônso mu mênà. Mwaneetu wa bakaji Hoover, tudi ne disanka dya kukumona mulwe, mu dinda emu, ufumina ku Kentucky. Ne Charlie ne Nellie, Mwaneetu Jeffries ne dikù dyende, ne bakwabo bààbúngì, bafumine pambelu paa cimenga.

⁷ Pa nanku tudi tutekemena cikondo cya dicyonkomoka mu Mukalenge, mu dinda emu, batekemene ne Nzambi neadisange neetu mu mushindu wa ubeneshu misuuka yetu ne utuyiisha bintu bitudi naabi dijinga.

⁸ Ne pândi ntuma mèsù eku ne eku mwaba wônso ewu, mèmè mubange kuteela balunda baanyi bônso badi eku ne eku aba mu mênà, nebingangate citupa cinene cya dinda edi, ngenza kuteela aba kuteela baba. Bidi byenza ne ndyūmwè bilenga bwa kwikala mwalukile mu ekeleeziya, bwa kumona bantu bônso balwe, bwa kumona mwa kudisangisha.

⁹ Nebiikale cinyi patwaya mu Dyulu, tukasangila Mwômò amu bwa cikondo cya dicyonkomoka dya kashidi, cya buuwetu bwa Cyendelele pamwe, banyungulukile Nkwasa wa butumbi wa Nzambi, ne mabeneshu miine atukaadi twètù bônso aba banangenange aa? Twètù, Mwômò amu, netwikale benza ku cifwanyikiji Cyende, ne mu cimfwanyi Cyende, biikale ne Nyuma Wende pambidi peetu, bwa kuMukuukwila ne kuMusadila mu Cyendelele cijima, katuyi mwa kucyokaku to.

¹⁰ Anji elaayi meeji, kakwena cintu nansha cimwe cyùdi mwa kwelela meeji, cyùdi ujinga kwenza, cyùdi ku musangu ne ku musangu kuyi udyumvwa mucyoke paudi ucyenza. Charlie, ngela meeji ne wèwè ne mèmè tutu tutamba kutwa buluwà bwa nshindi kupita byônso bitutu tujinga kwenza, mu mushindu awu, kadi, udi mumanye, utu ucyoka pautu ucyenza.

¹¹ Ne mèmè—mèmè ntu munange ku—kwenza ngendu mile ya lwa makàsà, kubanda mu mikuna kwenda anu lwa makàsà. Kadi's ntu ncyoka, mîngà misangu, ujinga kwenza cîngà cintu.

¹² Ne ntu munange kwendesha mashinyi. Mîngà misangu ntu mfika ku didyumvwa mucyoke ne muzengele, ne mijilu ya mutu insaama. Ndyela mu mashinyi aanyi kadi kupatuka, kacya ngaakwata ku yèndà, mpweka ne njila, ngenda ngimba ne: “Ndi nsanka bikole mu mushindu wa mfika ku dyamba ne ndi umwe wabo,” anyi cintu kampanda. Kacya anu ngúpukila ku yèndà aku, ngenda ngimba, ntuuta dikàsà panshi, ngela mbila. Nenku, ee, paanyima paa katanci, ncyoka, ne pashiishe ngalukila kumbelu mbanga kwenza cikwabo cintu.

¹³ Kadi patwikala tukuukwila Nzambi mu Bukalenge bupyabupya abu, kakwakwikalaku katanci nansha kakese kaa dicyoka to, anu—anu dibeneshu ndiikalaku misangu yônso, kacya anu dyangatangana. Kadi, bushuwa bwa bwalu budi ne, netwikale bashintuluke musangu awu. Katwakwikala mutudi

mpindyewu emu nansha. Netwikale bashiilangane, bifukiibwa bishiilangane ne mutudi dîbà edi emu. Pa nanku, tudi ne disanka.

¹⁴ Mvwa anu ngela meeji. Ncyêna mumanye, ne nkaadiku muteele bwalu ebu anyi to. Mwaneetu Charlie, kukaadi cikondo, tuvwa tusanganyiibwa nende mu Kentucky, ke yêyè kwamba ne: “Mwaneetu Branham, anji elabi meeji tũng, mu Bukalenge bwa bidimu cinunu, wêwè ne mêmè netwikale tukatwa buluwà bwa nshindi anyi?”

Mêmè ne: “Ncyêna ngela meeji nanku to, Charlie.”

¹⁵ Yêyè ne: “Ee, kadi paabi’s tuvwa banange ciina aci be,” ke yêyè awu, “wêwè—wêwè udi wela meeji ne netwikale twenza buluwà patwabwela mu Bukalenge bwa bidimu cinunu anyi?”

Mêmè ne: “To, cintu nansha cimwe kacyakushiibwa mu Bukalenge bwa bidimu cinunu to.”

Ke yêyè ne: “Ee, kadi paaci’s ke cituvwa banange.”

¹⁶ Mêmè ne: “Charlie, anji amba tũng bu mêmè mwa kukufikisha ku dyumvwa ne musangu kampana wêwè ewu uvwa ngulube, nenku wêwè kubanda milongo kufika cintu kampana cibandile, too ne ku diikala muntu? Udi mufwanyineku kuya, kujinga kwalukila ne kusankila bitu ngulube usankila abi anyi?”

Yêyè ne: “To.”

¹⁷ Mêmè ne: “Wamonu’s, udi mufwanyine kwikala mupite ngulube kule ne kule, mpindyewu, udi muntu, kwênàku mufwanyine kujinga kwikala kabidi ngulube nansha.” Mêmè ne: “Mpindyewu vudija cyôci aci misangu binunu dikumi, nenku ke ciwikala pawikala mushintuluke kuumukila apa ne ciwikala mushaale aci. Kwadyakujingaku kwikala kabidi muntu to.”

¹⁸ Mmwômò. Neciikale cintu cishiilangane. Ndi ne disanka dya dikema anu bwa meeji a bwine bwalu abu, a kumanya ne dîngà dituku netubande kupita apu.

¹⁹ Ee, mpindyewu, Mukalenge mwanyshe, dyalumingu dyalonda, diikalà bu...Nenku nêngùmukè, bwa kupatuka kuya ku Wyoming, ne mulunda wa pa mwoyi; anyi kupatuka kuya ku Idaho, ne mulunda wanyi wa pa mwoyi, Mwaneetu Miner Arganbright, Mwaneetu Clayt Sonmore, Beena Kilisto baa Kantu-ku-byanza.

²⁰ Lumingu lwalonda, lumingu lwalonda ludi lulwa elu, mmpindyewu ewu; mu matuku a ngondo 7, nebikengele ngikale mu—mu Dallas, Texas, mu Mpungilu wa Diyì dya Dyondopa. Nenku dyanyi diloolo dîngàayiishà nediikale mu matuku a ngondo 7. Nenku pashiishe nêngàlukilè, bwa kuya ku Idaho ne Mwaneetu Arganbright ne Beena Kilisto baa Kantu-ku-byanza. Nenku pàmwàpa nêmpicishè diloolo dimwe ku Minneapolis,

kumpala kwa twètù kuumuka. Ne pashiishe didya dimwepele dya dinda dya Beena Kantu-ku-Byanza.

²¹ Mukalenge mwanyishe, mu dinda dya dyalumingu didi dilwa edi ndi muswe kwalukila apa cyakabidi mu tabernacle emu, ne bu byòbì mwa kwikala byanyishiibwe ne biikale diswa dya Mukalenge. Nenku ndi muswe kwakula pa cyena bwalu cya *Mvùnda Mu Cipeepèlè*, Mukalenge mwanyishe. Civwa cyenze anu bu ne civwa pa mwoyi wanyi, lumingu lujima.

²² Nenku dinda dikwabo, dinda bwebwebwe, bu pa dîbà inaayi wa dinda nanku awu, mêmè kubiika ku tulu kadi kupeta meeji aa ne: “Dituku adi ku Kâlvariyo.” Nenku ndi muswe kwakula pôpò apu, mu dinda emu: *Ditùkù Adi Ku Kâlvariyo*.

²³ Nenku mpindyewu bwa kubala eku, tubuululaayi mu Bibles yetu mpindyewu, mu Mifundu, mu Evanjeeliyo wa Maataayi Munsantu, mu nshapita wa 27. Nenku netubangile ku mvnse wa 27 ne netubale citupa cya Mufundu ewu, bwa kupeta mwaba wa kujaadikila bitudi twamba, pashiishe netubange dyakamwe. Ne paanyima paa mudimu wa diyiiisha, nenku netwikale ne disambila dya babeedi.

²⁴ Nenku, kaa, kacya ku musangu mushaale mwab’ewu, ndi anu ngenza kwambulula, ne kutentula mushindu mupyamupya wa mudimu wanyi wa bwambi. Ndi mupete majaadiki adi maalukile afuma ku diine disangisha adi kupita ânkaadiku mupete mu dîngà disangisha dya kacya kwònsò aku.

²⁵ Kudi cintu kampanda pa bwalu abu, cidi cyenza ne anu nwênù bakonke muntu awu, katuyi tubala bûngì bwa misangu idi Citambe-mfukilu cileejiibwe to. Kadi, nwamonu’s, dyondopa bikengela diikale ku diitabuuja dya muntu yèyè mwine. Mpindyewu, muntu yèyè mwine mwikale ne diitabuuja . . .

²⁶ Nenku badi bamona, bu mudi, Nyuma Mwîmpè uya pa bateeleji ne wamba ne: “Bintu *kampanda* mbyenzeke. Nenku, ne, dînà dyebe n’*Kampanda*. Ne udi ufumina mwaba *kampanda*. Ne cintu *kampanda* ncyûdi mwenze. Ne neciikale mushindu *ewu*.” Nenku bamona byònsò abi byenzeka anu mushindu awu!

²⁷ Nansha nanku, muntu yèyè mwine, musòmbe mwaba awu, bivwa bikengela abandulule mutu àmbè ne: “Bwa aci cidi ne cya kwikala Nzambi. Ndi ngitabuuja dyondopa dyanyi.”

²⁸ Kadi, pamutu paa aci, muntu yèyè mwine udi wamba ne: “Ntentekele byanza unsambidile, bwa ngondopiibwe.” Kadi mushindu awu ke utudi balongeshiibwe muneemu mu Amerike, ne, mushindu awu, bwa kwitabuuja cyôci aci. Ne cyôci ciine aci’s ncyà mu Mifundu bulelela.

²⁹ Kadi mpindyewu tudi tusangana, mu Afrike ne mu myaba mishiileshiilangane, paudi anu ulekela cintu bu nanku cyenzeka, bateeleji bònsò nkòong bacyupukila musangu umwe, biitabuuja dyondopa dyabo, bwalu kí mbabalongeshe cintu to.

Nwamonu anyi? Kabatu nansha babalongshe dyondopa to. Nenku pashiishe padibo bamona cyôci aci, badi bamanya ne kudi Nzambi kampana udi ne mwoyi. “Nenku piikalaYe ne mwoyi, Yèyè—Yèyè udi kumutu kwa byônsò, ne Yèyè—Yèyè udi wondopa.” Nenku’s ke mudibi nanku, bwalu ntaku mmumana kuteeka, bishimikidi, bya ne Yèyè mmwondopi, ne udi wondopa bantu. Pashiishe padibo bamona Bwikadi Bwende bukwačila mudimu mu Ekeleeziya Wende, nenku badi bamba ne: “Aci ncikose bwalu. Ke citudi twètù biine bônsò naaci dijinga.”

³⁰ Kadi twètù mbatulongeshe, “ditentekela dya babeedi byanza,” ne bintu bya mushindu awu. Ke bwa cinyi kabyena byenda bîmpè mu Amerike to.

³¹ Mpindyewu nwavulukaayi ne, mu dinda dya dyalumingu dilwalwa edi, Mukalenge mwanyshe, Mwaneetu Neville neamanyishe bwalu abu, mu bushuwa bwa bwalu. Nenku—ne—*Mvûnda Mu Cipeepèlè*.

³² Mpindyewu, mvwa munkaci mwa dinupa kaacikondo kaa nwènù kubuulula mu Mifundu yenu, mu Maataayi 27. Tubangaayi kubala ku—ku mvense wa 27, wa Evanjeeliyo wa Maataayi Munsantu. Mpindyewu tuteelejaayi kubala eku ne ntema yônsò.

Nenku basalaayi baa nguvena kuyabo ne Yesu mu cibambalu cinene cya bantu bônsò, ne baakasangisha cisumbu cyônsò cya basalaayi kuwaye aku.

Ne baakamuvuula bilâmbà, ne baakamuvwadika cikowelu cikunze kunzuu.

Nenku paakamanabo kuluka cifulu cya butumbi cya mēbà, baakamwasaci pa mutu, ne dilenge mu cyanza cyende cya. . . : ne bavwa batwa cinù kumpala kwende, biikale bamwelulwila, bamba ne: Mwoyaawu, Mfumu wa Beena Yuda!

Nenku baakamutwila mate, ne baakangata dilenge adi, ne baakamutuuta mu mutu.

. . . paakamanabo kumwelulwila, baakamuvuula cikowelu aci, ne baakamuvwadika bivwalu byende, ne baakaya nende benda bamulombola bwa kumupoopelabo ku nkuruse.

Nenku pavwabo benda bapatuka apu, kusanabo muntu mulume kampana wa ku Sirene, dinà dyende Simona: baakamwenzēja ku bukole bwa kwambulaye nkuruse wende awu.

Nenku paakamanabo kubanda, kuya mu mwaba uvwabo babiikila ne Gologota, mbwena kwamba ne, mwaba wa kabalubalu kaa mutu,

Baakamupa mvinyo wa bwanji musambakaja ne mâyi a kanyonga kaa bululu bwa yéyè kunwa: . . . paakamanaye kubilabula, kaakaswa kunwa to.

Nenku baakamupoopela pa nkuruse, nenku ke bôbò kwabanyangana bilàmbà byende, ne baakeela nshoobo: bwa cyakambabo kudi muprofeta kukumbanaci ne: Bábànyàngányi bilàmbà byanyi munkaci mwabo, ne bèdi nshoobo pa bivwalu byanyi;

. . . basòmbe mwaba awu bwa kumulama;

Nenku baakateeka . . . kuulu kwa mutu wende dîyi dya dimubanda naadi difunda ne: EWU KE YESU MFUMU WA BEENA YUDA.

Pashiishe kuvwa bìvì babidi baakapoopediibwa nende, umwe ku dyabalume, ne mukwabo ku dyabakaji.

Ne ba—bapici baa njila bavwa bamwamba mambavi, bakupa mutu,

Bükale bamba ne: Wèwè wâkashimbula ntempelo, ne umwibaka mu matuku asatu, dîsùngiläku's. Pawikala Mwânà wa Nzambi, tuuluka ku nkuruse aku.

Bya mwomumwe kabidi baakwidi banene bavwa bamwelulwila, pamwe ne bafundi ne bakulu, bamba ne:

Yéyè wakasungila bakwabo; kayi mwa kudisungila yéyè mwine. Piikalaye Mfumu wa Izaleela, atuuluke mpindyewu ku nkuruse, nenku netumwitabuuje.

Uvwa weyemena Nzambi; amusungile mpindyewu, piikalaye muswe kumusungila's: bwalu uvwa wamba ne: Ndi Mwânà wa Nzambi.

Ne bìvì paabo, baakapoopediibwa nende pa nkuruse abu, baakamwela bipendu bimwebimwe abi mu babadyula, bamudyula.

Mpindyewu kubangila pa dîbà diisambombo kwakalwa mîdimâ mu ditunga dijima too ne pa dîbà dya citeema.

Nenku lwa pa dîbà dya citeema Yesu kwelaye lubila lwa dîyi dikole, wamba ne: Eli, Eli, lama sabachthani? mbwena kwamba ne: Nzambi wanyi, Nzambi wanyi, wândekèdì bwa cinyi?

Bamwe baa ku bavwa biimane mwaba awu, paakumvwabo aci, kwambabo ne: Muntu ewu udi ubiikila Eliya.

Nenku dyakamwe umwe . . . wakaya lubilu, ne wakangata musukulampampa, ne kuwuuja ne mvinyo wa bwanji, ne kuwasa ku dilenge, ne kumupaye bwa kunwa.

Bakwabo baakamba ne: Lekela, tumonebi ne Eliya ne walwa bwa kumusungila.

Yesu, paakeelaye cyakabidi lubila lwa dîyî dikole, wakakuula mwoyi.

Nenku, monaayi, cilâmbà cikudika cya mu ntempelo cyakapandika bipese bibidi kubangila kuulu too ne kwinsi; ne buloba bwakakanka, ne mbwebwe yakapandika;

...nkita yakabuululuka; ne mibidi yâbûngî ya bansantu bavwa balaale yakajuuka,

Ne yakapatuka mu lukita paanyima paa dibiika dyende dya ku lufu, ne yakabwela mu musoko wa cijila, ne yakamwenekela bantu bââbûngî.

Mpindyewu kapiteene kaa basalaayi lukama, ne bavwa nende, bavwa balame Yesu abu, paakamonabo dikanka dya buloba, ne bintu byakenzeka abi, baakakwacika bwôwâ bukole, kwambabo ne: Bulelela yêyê ewu uvwa Mwânâ wa Nzambi.

³³ Twinyikaayi mitu yetu katanci bwa disambila.

³⁴ Mukalenge, tudi bamanye ne Wêwè udi Nzambi. Ne... Paanyima paa dibala dya Dîyî edi dinsantu ne dya cijila, tucidi anu mwa kumona ne ngiikadilu Webe kî mmushintuluke to. Udi misangu yônsò anu Nzambi. Ne byakamweka anu bu ne Yesu kavwa upetaku dikwacisha to, ne wakangaciibwa kudi byanza bya lwonji ne baakamusunsulula, kumutwila mate, kumwelulwila, ne kushaalaye mukudika ku nkuruse, mashi bizololoka, ûpûnga ne lufu. Ne byakamweka anu bu ne kakuvwaku dikwacisha nansha dimwe to, mwaba nansha umwe, mwakafikaYe ku dyela lubila, Yêyê mwine ne: “Nzambi Wanyi, Nzambi Wanyi, WâNdekedi bwa cinyi?”

³⁵ Kadi, Wêwè utu wenza bwalu mu cikondo cidi cintu cikwabo nansha cimwe kacyiku mwa kwenza bwalu to. Bikengela tumanye, Mukalenge, ne patwikala ne misulu itudi katuyi ne mushindu wa kusabuka, patwikala ne mikuna itudi katuyi ne mushindu wa kushimuna, Nzambi utu mupiluluke mu dyenza dya bintu bidi bakwabo kabayi mwa kwenza.

³⁶ Wêwè utu mupiluluke, mu mudimu mwine ewu, bwalu Wêwè uvwa mumanye kabingila kaa dituku adi ku Kâlvariyo. Wêwè, mwikale Nzambi, Wa kayi mikalu, uvwa mumanye ne dîbâ adi divwa ne cya kulwa. Kadi paakakumbanadi, ke Wêwè kuleeja ne Wêwè udi Nzambi. Wêwè kuleeja ne uvwa mfumu Nganyi. Wêwè kukankisha buloba, ne bansantu bavwa balaale mu buloba kupatukabo. Wêwè kuvwija dîbâ mîdimâ kwandamukadi bufuku, anu bu mîdimâ ya bufuku, uleeja ne Wêwè ke uvwa Nzambi. Kadi Wêwè kumweka anu bu mupuwe cikondo cyônsò aci.

37 Twètù, kuumukila ku cyôci eci, utufikishe ku dyoya edi, ne, misangu yônsò itudi twenda mu Nyuma, balombola kudi cyanza cya Nzambi, nansha cintu cimweke bu cidi kaciyi cyenda bîmpè, nansha nanku Kâlvariyo kadi anu katwîmànyîne; Nzambi neakule pa dîbà didi dikengela kwakula, pa cikondo menemene.

38 Mpindyewu, Taatu Nzambi, tudi baswe kulomba luse bwa mpekaatu yetu ne matomboka etu. Tudi baswe kulomba bwa Nyuma Webe atulombole. Utulomboleku, mwakalombola Nkuci Mwânà wa mukooko. Twikale batumikidi ku cyônsò cidi mwa kutuvwila aci, bu mutudi bamanye ne, Nzambi utu uvwija maalu ônsò anu mîmpè, ne tudi bamanye ne nebiikale anu bîmpè.

39 Ikala neetu lelu ewu mu mudimu ewu. Tudi tulomba bwa Wèwè kusungila aba badi mu mushindu wa kusungidiibwa, ne biikale bakeba disungidiibwa. Uuja ne Mwoyi wa Cyendeleele, aba badi bawukeba. Tudi tulomba bwa Wèwè kwondopa aba badi basaama ne badi mu ntatu, badi balwe, biikale bakeba dyondopiibwa. Nenku netuKutumbishe bwa bwalu abu. Tudi tubilomba mu Dînà dya Mwaneebe, Musungidi wetu, Yesu Kilisto. Amen.

40 Mpindyewu, mu dyakula dya mu dinda emu, tudi tujinga kukoka ntema yenu ku cyena bwalu cindi musungule bwa kwakulapa eci ne: *Ditùkù Adi Ku Kâlvariyo*.

41 Bwalu ebu budi bumweka anu bu ne mbufwanyine kwikala ndambu bu kabuyi mu cikondo cyabu to; bivwa bikengela kwikalabu mu Diiânù Dinsantu. Bivwa bikengela kwikala kuvuluka Kâlvariyo ku dituku ne ku dituku. Ne twètù biine tukaadi bumvumwe byàbûngi pa bwalu ebu, babalebale byàbûngi pa bwalu ebu. Bayiishi mbyaiisheyiishe pa bwalu ebu, nkacya anu bikondo byabanga. Bimbi baa misambu bakaadi bimbimbe pa bwalu ebu, mu bikondo byônsò. Baprofeta baakadyanjila kubwamba, bidimu binunu binaayi kumpala mene kwa kwenzekabu. Ne baprofeta baa dituku edi badi bafunkuna munu paanyima biikale baleeja cikondo mene cyakenzekabu. Ndituku dya mushinga wa kacya! Ndimwe dya ku matuku adi matambe kwikala a mushinga mukole a ku matuku ônsò akaadiku Nzambi mwenze àcyacyà ìliilà pa buloba ebu aa.

42 Nenku piikaladi dya mushinga munene nanku awu bwa bukwabantu, Kâlvariyo, ndi ngela meeji ne mbîmpè twètù twalukile paanyima bwa kukenketa, kumona cîdidi dyumvwija menemene bwetu twètù. Bwalu, ndi mutwishiiibwe ne, mu dîbà dya ndekeelu ditudi ne mwoyi edi, tudi munkaci mwa kukeba cyônsò cidi cileeja ne Nzambi udi ne mushinga mu dyetu peetu dimanya. Nenku cyônsò citudi mwa kujandula aci, tudi mwab'ewu mbwa kuciyiila, bwa kumona ne cîdi bwetu twètù ncyèpi, ne cidi Nzambi mwenze bwetu twètù, ne kumona

cyakalayaYe bwa kwenza bwetu twètù. Nenku ke citudi tuvwila mu ekeleeziya. Ke bwa cinyi muyiishi udi uyiisha, ke bwa cinyi udi ulonga ne welangana meeji mu Mifundu, ne ukeba disonsodiibwa, mbwalu yèyè mmusadidi wa pa bûtookà kudi cisamba cya Nzambi. Nenku udi uditacisha bwa kupeta cintu kampanda ciikala mwa...cidi Nzambi mufwanyine kwikala ne cya kwambila cisamba Cyende, cintu cidi cifwanyine kubakwacishaku. Misangu mikwabo, ncifwanyine kwikala, kubapiisha mu mpekaatu yabo, kadi cifwanyine kwikala dikwacisha bwa kubajuula panshi, bwa baamona mwa kulekela mpekaatu yabo ne pashiishe kujuukilabo kuulu bwa kusadila Mukalenge. Nenku budi bambi naabu mbwa kukebakeba bintu ebi.

⁴³ Nenku dituku edi, bu mudidi dya mushinga munene, dimwe dya ku matuku matambe bunene, tutangilaayi bintu bisatu bishiilangane ebi bidi dituku adi dyumvwija bwetu twètù. Tudi bafwanyine kubyangata nkama. Kadi, bwa mu dinda emu, ndi musungule anu bisatu cyanaana, bintu bya mushinga mutambe bunene bitudi baswe kutangila, mu tusunsa tukese menemene tudi tulonda etu, civwa Kālvariyò kumvwija bwetu twètù. Ne ndi ndomba bwa cyôci aci cipiishe ngènzàmpèkààtù yônsò udi kaaba aka; necifikishe munsantu yônsò ku diya ku binù; necifikishe mubeedi yônsò ku dibandisha diitabuuja kudi Nzambi, ne kuumuka kuya, mwondopiibwe; ngènzàmpèkààtù yônsò, musungidiibwe; muntu yônsò udi mutwe cimpinga bwa kwalukilaye, ne kudyumvwaye yèyè mwine bundu; ne munsantu yônsò, bwa kusankeye, ne kupeta mushindu mupyamupya wa dikwata ne ditekemene dipyadiya.

⁴⁴ Cintu cimwepele ne cya mushinga, cidi Kālvariyò kumvwija bwetu twètù ne bwa baa pa buloba, ncyane, kaakajikija cilumbu cya mpekaatu, musangu umwe cyendelele. Muntu uvwa musanganyiibwe mupiile ku mpekaatu. Ne mpekaatu uvwa ncibawu civwa muntu nansha umwe kayi mwa kufutaku to. Cibawu aci civwa citambe bunene mu mushindu wa ne kakuvwa muntu nansha umwe uvwa mwa kufutaku cibawu aci to. Ndi ngitabuuja bulelela ne Nzambi wakatuma dîyî bwa kwikalaci mushindu awu, bwa cibawu kwikalaci cinene menemene mu mushindu wa muntu nansha umwe kayiku mwa kucifuta to, bwa Wamona mwa kucyenza, Yèyè mwine. Mpindyewu, cibawu cya mpekaatu civwa ndufu. Ne twètù bônsò tudi balela mu mpekaatu, bafwimba mu bubu, balwe pa buloba apa, biikale twamba mashimi. Ke bwa cinyi kakuvwa nansha umwepele wa kutudi uvwa mukumbanyine to, anyi, kabaakapeta nansha umwe pa buloba uvwa mukumbanyine to.

⁴⁵ Ne mpekaatu mwine kaakabangila pa buloba to. Mpekaatu wakabangila mu Dyulu. Luci...uvwa...Lucifer, dyabulu, ukaavwa cifukiibwa cipiishiibwe, bwa cishiku cyende, kumpala mene kwa kudyataye pa buloba. Mpekaatu wakabangila

mu Dyulu, muvwa Nzambi muteeke Banjelo, ne bikwabo, pa bishimikidi bimwebimwe byakateekaYe bantu; dimanya, mucu wa dimanya, mucu wa Mwoyi ne mucu wa dimanya, kuvwa muntu mwa kwenzela disungula dyende. Nenku Lucifer paakapeebwaye bukookeshi, bwa kwenzaye dyende disungula, yêyê wakajinga cintu kampana cîmpê cipite ne civwa Nzambi naaci. Ke cyakabanga lutatu neyaci.

⁴⁶ Nenku kuvwa mushingà bwa mpekaatu. Mushingà awu uvwa ndufu. Lufu ne luvwa cibawu. Nenku, mbwena kwamba ne, tudi bafwanyine kubwela mu cyôci eci kadi kucisunsula bikole, bwalu ncyêna ngitabuujane ne kudi lufu anu lumwepele to. Kudi Mwoyi umwepele. Ne ndi ngitabuujane ne muntu ne Mwoyi wa Cyendelelee kêna mwa kufwaku to. Ne ndi ngitabuujane ne kudi dibutudiibwa dya kashidi kashidi dya musuuka ùdi wenza mpekaatu, bwalu Bible mmwambe ne: “Musuuka udi wenza mpekaatu, neufwe bulelela.” Pa kuumusha muntu to; “*musuuka* ùdi wenza mpekaatu.” Pa nanku, Sataana udi ne cya kufwa bulelela, bwa kubutudiibwaye kashidi kashidi. Mêmè’s ndi mbengangana ne ba-universalistes badi bamba ne Sataana neasungidiibwe! Wâkenza mpekaatu nyêyê, ne yêyê mene ke mubangi wa mpekaatu. Ne musuuka wende ngwakenza mpekaatu; ne yêyê uvwa nyuma. Nyuma awu neabutudiibwe kashidi kashidi, bwa kakuyi kushaalaku kantu nansha kamwe to.

⁴⁷ Nenku mpekaatu mmwenzane anu ulenga pa buloba, ku cibangidilu kwaka, byenze bu dibejane difiike fitutuu diikale dimata difumina mu maulu, wakatengununa buloba anu byetu bya bushuwa ebi. Mpekaatu kwela cifukiibwa cyônsò, pa buloba, ne bufuki bwa Nzambi bwônsò, mu bupika. Ke muntu kwikalaye mu bupika bwa lufu, bwa disaama, bwa lutatu, bwa tunyinganyinga. Bufuki bwônsò kudishindabu nende. Mpekaatu kwikalaye bwanga bwa dibenga kusaamisha bwakatengununa buloba anu cya bushuwa. Ke pasiishe twêtù kuteekiibwa mwab’ewu, katuyi ditekemena, bwalu cifukiibwa cyônsò pa buloba cikaavwa cikookeshiibwe kudilu. Muntu yônsò ukâavwa ulediibwa pa buloba ukaavwa mukookeshiibwe ku lufu.

⁴⁸ Nenku, byakakengela bwalu ebu bufumine mu Mwaba kampana muvwa kamuyi lufu to. Kabuvwa mwa kufumina pa buloba to. Umwe wetu kavwa mwa kupikula mukwende to. Bivwa bikengela bufumine kudi Mukwabo.

⁴⁹ Ke bwa cinyi, paakafika muntu ku dyumvwa ne ukaavwa mutapuluke ne Nzambi wende, ke kushaалаye mulalakanyi. Bôbò kudila mwadi. Bôbò kwela mbila. Bôbò kuyooba. Bôbò kulalakana, mu mikuna ne mu bipeela, benda bakeba Cimenga cidi mucuubaki ne mucyenji mwikale Nzambi. Bwalu, uvwa mumanye ne bu yêyê mwa kwalukila mu Bwikadi bwa Nzambi, uvwa mwa kuyiikilangana Nende pa bwalu abu. Kadi kakuvwa njila wa dyalukidila to. Ke kushaалаye mujimine. Kayi mwa

kumanya ne njila wa kuyiila ngwèpì to, pa nanku ke yêyè kupatuka kuya mwine, wenda ulalakana, utata bwa kupeta kaaba kaa kupetela njila wa dyalukidila ku Mwaba awu. Cintu kampanda munda mwende kumwambila ne uvwa mufumine ku—ku Mwaba uvwa mupwangane. Kakwena muntu nansha umwepele mwaba ewu munkaci mwa bateeleji batudi tumona ne mèsù aba, mu dinda emu, anyi munkaci mwa bateeleji baa mukaba wa mèyì, kwònsò kwayawu pa buloba bujima aku, kakwena muntu nansha umwepele mwaba ewu, nansha penyi, udi kayi ukeeba bupwangane abu nansha.

⁵⁰ Paudi umana kufuta factures yebe, udi wela meeji ne: “Aci necyakaje bwalu.” Paudi umana kufuta factures yebe, pashiishe muntu mukwabo ubanga kusaama mu dikù dyebe. Padi disaama adi dyondopiibwa kujika, pashiishe upeta kabidi factures mipite bûngì ya difuta. Cya kumpala, ubanga kutoloka mvyà, nenku pashiishe ubanga kujinga kwalukila ku bwânà. Nenku kudi anu cintu kampanda dîbà dyònsò, ku musangu ne ku musangu, ciine aci mbwa divwala dya mpekaatu adi. Kadi munda mwa mwoyi webe, anu bwalu udi ukeba cyôcì aci, bidi bileeja ne kudiku anu Bupwangane mwaba kampanda. Mwaba kampanda, kudi cintu.

⁵¹ Ke bwa cinyi, misangu yàbûngì, leelu ewu, ngènzàmpèkààtù udi anu wenda ulalakana. Nsongakaji mulenga kwìsù, neakose bipya bya nsuki yende, bwa kumanyikaye; neadilaabe bilaabu kwìsù, bwa kumwenekaye mwîmpè; neavwala bilàmbà bidi bileeja mbungakeenu wa mubidi wende. Mbwalu, ke cintu cimwepele cidipe pende mwa kupeta, kupeta mwaba kampanda bwa kuteeta kupeta cintu kampanda cidi mwa kumupinganyina, padiye mwa kufikisha balume ku dimwela mwonzo, kumukupya cyanza, kunaya nende pambidi. Nsongalume neénzè cintu cimwecimwe aci ne mukaji, uteeta bwa kwikala ne mmwenekelu wa ukoka mukaji awu. Beena mutumba nebiibake nzubu, kumulongolola mushindu kampanda, bwalu neamwenekeku mwîmpè kupita wa mwena mutumba nende. Cyôcì aci ncidiku dîbà dyònsò edi, tudi mu dikeba dya cintu kampanda, ne cintu kampanda cidi anu cibanda kumutu kwa cyôcì aci. Nsongakaji neasangane ne nsongakaji mukwabo mmumanyike kumupita yêyè. Mwena mutumba neasangane ne nzubu kampanda udi umweka mwîmpè mupite wende yêyè. Mukaji neasangane ne mukaji kampanda mmuvwale mu mushindu kampanda, mwikale umweka mwîmpè mupite wende yêyè.

⁵² Ncintu kampanda munda mwetu emu, ciikale cikeba cintu kampanda, ne ciikale cileeja ne tudi bajimine. Tudi baswe kupeta cintu kampanda aci ciikala mwa katufikisha ku disankishiibwa adi, ciikala mwa kuuja kaaba kaa nzala kàdimu aku, kadi mbyenze anu bu ne katwena mwa kucipeta to. Bantu mbateete cyôcì aci mu bikondo byònsò. Mbadile too ne myadi bwa kucipeta. Mbeele ne mbila. Mbenze ne mwabo mwònsò

muvwabo paabo mwa kwenza, kadi kabayi anu mwa kucipeta to, benda anu balalakana pa buloba bujima.

⁵³ Ndekeelu wa byònsò, dimwe dituku, ke dyôdi dituku dya Kàlvaryò adi, kwakapweka Kampanda ufumina mu Butumbi. Kampanda awu, mwena Dìnà dya Yesu Kilisto, Mwànà wa Nzambi, Wàkafumina mu Butumbi, ke Kàlvaryò kwenzekaku. Ke dituku adi dyakafuciibwa dibanza, ne dyakajikijabo cilumbu cya mpekaatu kashidi. Ke dyôdi kukangula njila udi ufila ku cintu ciine citudi naaci nzala ne nyoota eci. Dyôdi kutwala kaaba kaa disankishiibwa. Kakwena muntu nansha umwe ukaadiku muye kamona Kàlvaryò, mukàmòne mushindu uvwaku awu, kadi kushaala wa mwomumwe nansha kakese. Byònsò bivwaye ujingajinga anyi naabi majiya, yèyè wàbipeci, padiye anu udyata dikàsà mu mwine mwaba awu.

⁵⁴ Divwa dituku dya mushinga mukole, ne cintu cya mushinga mukole menemene, mu mushindu wa ne cyakakankisha buloba. Cyakakankisha buloba, mu mushindu uvwabu kabuyiku bwanji kukankishiibwa kwònsò aku to. Paakafwa Yesu ku Kàlvaryò ne kufutaye bwa cilumbu cya mpekaatu, buloba ebu bwa mpekaatu bwakafwa cipuuka. Dìbà dyakabwela mu nkankala wa dituku, dyakapeta disaama dya mutu. Ke mbwebwe yôyi kunyukukayi, mikuna e kupandikayi, ne mibidi ivwa mifwe e kusotoka kupatukayi mu lukita.

⁵⁵ Cyakenza cinyi? Nzambi wakaludikila, pa Kàlvaryò. Kutapaye nyama awu mputa, udibo babiikila ne Sataana, kashidi. Mpindyewu mmushaale ne lwonji lupite kubangila mwaba awu, bwalu cyakatwadila bukwabantu Bukènkè. Muntu yònsò wetu ewu mmumanye ne nyama mutapa mputa ke dìbà didiye ushaala ne lwonji kupita, mushaale wenda udikoka mwikale ne mwongo mumana kucibula. Mpindyewu, Sataana wakeediibwa cibula cya lufu, ku Kàlvaryò. Buloba bwakajaadika ne ke muvwu bwalu nanku.

⁵⁶ Mushinga mutambe bunene ukaadiku mufuciibwe, ne anu Kampanda umwepele nguvwa mwa kuwufuta, wakalwa kuwufuta ku Kàlvaryò. Ke kwakafuciibwa mushinga munene awu. Ke cimwe cya ku bintu ncyôci aci. Nzambi nguvwa mucilombe bu ne ke mushingà. Muntu nansha umwe kavwa mukumbanyine to. Muntu nansha umwe kavwa mukumbane to. Muntu nansha umwe kavwa ne bukole bwa kucyenza to. Ke Nzambi kulwaye, Yèyè mwine, ne kudyzenzaye muntu, ne kwikalaye ne mwoyi bu muntu, mwikale ne majinga a muntu, ne kupoopediibwaye pa nkuruse ku Kàlvaryò. Nenku kwòkò aku, paakeela Sataana meeji ne Yèyè kavwa ne bukole bwa kucyenza to, ne Yèyè kavwa mwa kupicilamu to, ke Yèyè kupicila ku Getsemane ne ku diteecibwa dyònsò divwa muntu yònsò ewu mwa kutwala. Ke Yèyè kupicilaku anu muvwu bantu bònsò, kadi Yèyè kufuta mushinga.

57 Ke cyakeela mîdimà pa buloba. Cyakenza bu bwanga bwa dibenga kusaamisha, bwa pa kupanda kwa muntu. Padi ngangabuka utwa muntu bwanga bwa dibenga kusaamisha, udi wanji kumufwisha cipuuka, kumpala kwa kupeta mushindu wa kumupanda. Nenku Nzambi paa—paakapandaye Ekeleeziya, buloba bwakatwibwa bwanga bwa dibenga kusaamisha, bufuki bwakapaluka. Kabyena bikemesha to! Nzambi, mu mubidi wa buntu, uvwa ùpùnga ne lufu. Ke dîbà divwa baa pa buloba bindile, kadi bààbûngî baabo kabaakadijingulula nansha.

58 Anu mudibi leelu ewu, bààbûngî bavwa bindile bintu ebi, kadi nansha nanku kabeena babijingulula to. Kabeena bafika ku dyumvwa ne njila wa dipatukila nyêyè ewu to. Bacidi anu benda bakeba bisankasanka ne maalu a pa buloba, bateeta bwa kupeta njila wa dipatukila wabo bôbò.

59 Kuvwa, kuvwa makunji àbûngî avwa ne bimanyinu miikale afunkuna dituku adi, bimanyinu binene byàbûngî bikaavwa bidyânjile. Bakaavwa badyanjile kubileeja mu bindidimbi kudi mwânà wa mukooko, kudi cimpanga cya ngombe, kudi kaamandankuci, ne kudi bintu byônsò ebi, kadi kabivwa mwa kushipa cyôci aci to. Kabivwa mwa kupaula nzadi ya lufu ayi to, mwakalaminabo buloba kudi Sataana.

60 Mbwebwe miine ivwaye udyata wendelapu musangu kampana, ubanda upweka pa buloba, souffre wa kapyà! Lucifer ke uvwa mwânà wa lunkeelu, ne yêyè nguvwa wendela pa buloba pavwabu volcan wa kapyà. Mbwebwe imweimwe ayi ikaavwà mimane kutalala ayi, paakafwa Yesu ku Kàlvaryò, buloba bwakooloka kadi kuyîlùka.

61 Mushinga wàkafucibwà awu, bupika bwa kudi Sataana bwakakoseka. Nzambi kwaluja mu byanza bya muntu, njila wa dyalukidila ku civwaye ukeba. Kabicivwa bikengela kabidi bwa kudilaye mwadi to. PaakatuutaYe, paakacibulaye mwongo wa Sataana, kwaka ku Kàlvaryò, mwongo wa mpekaatu, wa disaama! Nenku aci ncidi cyaluja muntu wa cifwaka yônsò ewu, pa buloba, mu Bwikadi bwa Nzambi, ne mpekaatu miikale mifwidiibwe luse. Aleluuyah! Mpekaatu yetu mmifwidiibwe luse. Sataana kacyenaku kabidi mwa kutukangila njila wa kuya kudi Nzambi nansha.

62 Kukaadi cibeeba cisebela. Kukaadi kuteekiibwe telefone. Kukaadi nshinga muye too ne ku Butumbi, bifikisha muntu ne muntu ku dyolola cyanza kukwata mwine nshinga awu. Muntu yêyè mûle tente ne mpekaatu, nshinga awu mmumutwangaje ne centrale. Yêyè udi mwa kufwidiibwa luse ku mpekaatu awu. Pa kuumusha anu aci to, kadi mwine mpekaatu awu bakaadi bamufucile mushinga. Kaa! Kabyena bikengela bwa wêwè kwamba ne: “Neyèna mukumbanyine” to. Bushuwa, kwèna mukumbanyine to, kuvwaku mwa kwikala mukumbanyine to. Kadi Kampanda uvwa mukumbanyine nyawu mwangate kaaba

keebe. Udi mudishikamine. Kabyena bikengela wikale kabidi ulalakana to. Kabyena bikengela wikale muntu mukebi wa bisankasanka pa buloba apa to.

Bwalu kudi mpokolo mûle ne Mashi,
Makoka mu mijilu ya Emanuwele,
Mudi bangenzàmpèkààtù bôbò badîne
mwinshi mwa nkwaka awu,
Badi bajimija dikeji dyabo dyônsò dya dipiila.

⁶³ Kabyena bikengela wikale mujimine to. Kudi cibeeba, ne Njila, ne badi bamubiikila ne Njila wa cijila. Muntu mukooyike kêna upicilamu to. Bwalu, udi wanji kupicila mu mpokolo, dyambedi, nenku ushiisha kubwela mu cibeeba.

⁶⁴ Wakacibula makole a Sataana. Wakakangula biibi bya buloko bya mwaba wa bafwe, mukangwile muntu yônsò uwabô bakangilemu, pa buloba ebu, mu maloko, mwikale ne bwôwà bwa ne pavwaye mwa kufwa, civwa lufu mwa kwikala kudiye. Ku Kâlvariyo, Yêyè wakakangula biibi bya tuzubu twa buloko abi, wakalekela mupika yônsò uya mudishikamine. Kabyena bikengela kabidi bwa mpekaatu kwikalaye mukuvingile panshi to. Kabyena kabidi bikengela bwa kufila bidimba byebe ku mpekaatu, ku dinwa dya maala, ku dinwa dya mfwanka, ku dinaya dya twarta twa mfranga, ku dyamba dya mashimi to. Udi mwa kwikala muntu wa kweyemena, wa maalu malulame, ne mujaalame. Ne Sataana mwine kêna ne cyenzaye pa bwalu abu to, bwalu ukaadi mukwate ku nshinga, Nshinga wa disungila udi mwele lwongo mu Lubwebwe lwa Bikondo. Cintu nansha cimwe kaciyena mwa kukutuulaKu to. Bipeepele nansha bya bishi kabyena mwa kukutuulaKu to. Cintu nansha bacyamba ne ncinyi, nansha lufu lwine, kalwena mwa kukutapulula ne dinanga dya Nzambi didi mu Yesu Kilisto to. Ke cyôci aci civwa Kâlvariyo kumvwija.

⁶⁵ Bantu bavwa mu bupika baakabapa budishikaminyi. Bantu bavwa kala wawa mwinshi mwa bwôwà bwa lufu kabacyena kabidi ne bwôwà bwa lufu to. Muntu udi ujinga Cimenga, cidi muciiibaki ne mucyenji, Nzambi, udi mwa kudyata dikàsà mu cibeeba, ne kutangija mpala wende mu Dyulu, bwalu ukaadi mudishikamine. Aleluuyah! Ukaadi mupikula. Kacyenaku kabidi ne bwalu bwa kulalakana to, bwalu kudi mushindu wa kumanya ne udi mubinge anyi kwêna mubinge. Nzambi ngudi utupa Mwoyi. Mpekaatu yetu ikaadi miye. Dituku adi ku Kâlvariyo dyakafuta mushinga. Patudi tumona byônsò abi, kabyena bikemesha paakafunda mwedi wa kasala ne:

Munkaci mwa mbwebwe yenguluka ne maulu
afiika,
Musungidi wanyi kwinyika mutu Wende e
kufwaye.

Cilàmbà cikudika cipandikile e kusokolola
 Njila
 Udi ufila ku masanka a Dyulu ne dituku kadiyi
 ndekeelu.

⁶⁶ Kabyena bikengela bwa Abraham kwikaleye wenda ulalakana kabidi to, eku ne eku kwa ditunga, wenda ukeba cimenga kampanda. Kabyena bikengela bwa ngènzàmpèkààtù ikale wenda ulalakana kabidi to, bwa ne udi mwa kusungidiibwa anyi kèna mwa kusungidiibwa. Kabyena bikengela bwa mubeedi ikale udikonka ne udi mwa kwondopiibwa anyi kèna mwa kwondopiibwa. Cilàmbà cipandikile aci, dituku adi ku Kàlvaryò, cyakasokolola Njila udi ufila ku bucimunyi bwònsò nkòòng. Nzambi mmutupe makole a Nyuma Wende, bwa twètù kwikala ne nsòmbelu wa bucimunyi pa bintu byònsò ebi; udi utulomba anu bwa twitabe cyòcì aci. Cyakenzeka dituku adi ku Kàlvaryò. Kakwakadiku dituku bu dyòdi adi to. Kakwadyakwikalaku dituku bu dyòdi adi to. Kabicyena bikengela diikaleku kabidi to. Dibanza ndimana kufuta, ne twètù tukaadi bamana kupikula. Twasakidila kudi Nzambi! Tukaadi bamana kupikula. Kucyena kabidi ne bwalu bwa kwikala kudikonka to. Kakucyena kabidi bya kudicinkila nansha. Byònsò mbimana kuumusha. Cilàmbà cikudika cyakakoka ridò, nenku tukaadi ne makàsà mateeka mu cibeeba, katuciyi ne bya didikonka kabidi to, anu kwitabuuja ne kutungunuka anu ne lwendu. Tudi tubwela buludi mu Bwikadi bwine bwa Nzambi.

⁶⁷ Abraham uvwa mumanye, ne bakwabo bavwa bamanye ne, pavwabo benda bakeba Cimenga aci apu, bavwa bamanye ne bavwa bafumine Mwaba kampanda. Cintu kampanda ke civwa cyenzeke. Bavwa basòmbèle mu buloba butungunuke. Dikanka dya buloba kwenzeka. Mvunda e kulwa. Mvita ne dishipangana! Mbwa wa diitu ne kànà kaa mukooko bidyangana, anyi mbwa wa mwitu udyà kànà kaa mukooko, ne ntambwe udyà ngombe. Kabiyi bimwekaku bikumbanangane to. Kudi katanyi. Uvwa mumanye ne kuvwa katanyi. Bantu bashipangana muntu ne mwanaabo; taatu ushipa mwanende wa balume, mwànà ushipa tatwèndè. Kudi katanyi. Yèyè ubanga kukulakaja. Ubanga kufwa. Unyaanunuka. Disaama dimukwata. Yèyè mu bupika. Mici itoloka, kadi kayiyi mwa kushaala kayiyi ifwa. Miikale ifwa. Mukuna ushintuluka. Mâyì a mbû akama. Mâyì apangika. Kudi katanyi. Nenku ke yèyè kwikalaye wenda ukeba mwaba, Cimenga civwa byòbì abi kabiyi mwa kwenzeka kabidi to. Uvwa mumanye ne, bu yèyè mwa kupetaku mushindu wa kwalukila mu Bwikadi bwa Ewu wákabyènza bijaalame awu, uvwa mwa kuyiikilangana Nende pa bwalu abu.

⁶⁸ Kaa, wèwè ngènzàmpèkààtù, ndyèsè kaayi, edi, mu dinda emu, dya kumanya ne wàpecì Njila awu mpindyewu. Dituku adi ku Kàlvaryò dyakakangula njila. Civwa bankambwa

bònsò benda biipatangana naaci ne bakeba aci, Kàlvaryò nyewu kaakupi wèwè, cyanaana. Udi mufwanyine kucibenga munyi? Mmunyi mùdi mufwanyine kucibenga, bwa kulamata ku dingumba? Mmunyi mùdi mufwanyine kucibenga, bwa kucishintakaja ne cintu cya cyanaana, bisankasanka bya pa buloba? Mbwa cinyi kubenga kuciitaba? Cilàmbà cikudika cyàkakàngukà aci cidi cyaluja muntu buludi mu Bwikadi bwa Nzambi, kayi ne mpekaatu pambidi to, nansha wa mushindu kaayi. Ne cidi citeeka cibeeba kumpala kwende, too ne ku cintu cidiye ukeba aci: Dyulu, butumbi, ditalala, Mwoyi wa Cyendelele, bintu byònsò bimuteekela anu kumpala kwende.

69 Dituku adi divwa ndi—ndikofi dya lufu dituuta bukole bwa Sataana. Dyakajikija byònsò.

70 Nenukù mèmè ndi mwa kuMumona kwòkò aku; Yèyè uvwa mwànà wa mukooko wa mu Edena, kubangila anu ku cimfwanyi mene cya kumpala cyakalwa cya bwine bwalu ebu.

71 Abele, ku diitabuuja, paakalambulaye Nzambi mulambu mwìmpè menemene kutamba wa Kaayina, uvwa ne cya kwikala muswike mwo—mwonji wa mvinyo mu nshingu mwa mwànà wa mukooko, kumukokelaye too ne ku lubwebwe. Kwangataye di—dibwe mu cyanza cyende, bu ne ke keele kaa dipanda naaku, ne kukokelaye katu kende kakese aku paanyima, kumukosaye ne kumukosololaye too ne paakafwaye. Ne myòsà yende kubola ne mashi ende yèyè mwine. Kudivwandaye mu mashi ende. Civwa ncmfwanyi.

72 Kadi dituku adi ku Kàlvaryò, kakuvwa mwànà wa mukooko wa buloba ebu to, kadi civwa m’Mwànà wa mukooko wa Nzambi, mwikale ufwa, mwikale udivwanda mu Mashi Ende Yèyè mwine. Wakakosolodiibwa, ne kukoshiibwa, ne kutuuciibwa, ne kutwidiibwa mate, ne kukumiibwa ne cikisu, ne kutuuciibwa mapi, ne bikwabo, kudi baa pa buloba, ne Mashi bisompoka ku nsuki Yende.

73 Paakafwa mwànà wa mukooko wa Abele, wakafwa, mwikale wakula mu mwakulu uvwa Abele kayi mwa kuumvwa to. Uvwa udila bee bee.

74 Ne paakafwa Mwànà wa mukooko wa Nzambi diine dituku adi ku Kàlvaryò, Wakaakula mu mwakulu uvwa muntu nansha umwe kayi mwa kuMuumvwa to. “Nzambi Wanyi, Nzambi Wanyi, Wàndekèdi bwa cinyi?” Civwa m’Mwànà wa mukooko wa Nzambi, musunsulula, mukosolola.

75 Yèyè ke Mwànà wa mukooko menemene uvwa nende Abele mu meeji, paakamonaye Dimiinu dilaya dya mukaji. Yèyè ke Mwànà wa mukooko uvwa Danyele mumone, wàkajoomoka ku mukuna, kakuyi ku byanza bya muntu. Yèyè ke uvwa Lukata uvwa munkaci mwa lukata, bwa muprofeta. Byònsò bikaavwabo badyanjile kumona byakakumbana dituku adi,

dituku adi ku Kàlvaryò. Ke cyakabweja cintu cinene aci. Ke cyakacibula mwongo wa Sataana aci.

⁷⁶ Cyakumpala, bivwa bikengela twètù kukeba civwa dituku adi dyumvwija. Ciibidi, bivwa bikengela twètù kumona cidi dituku adi dyenze bwetu twètù, mpindyewu, cididi dyenze bwetu twètù. Mpindyewu, ciisàtù, tutangilaayi civwa cikengela twètù kwenza bwa dituku adi. Civwa cikengela twètù kwenza ncinyi?

⁷⁷ Cyakumpala, bivwa bikengela twètù kutapamu dísù, bwalu ndituku dinene, dinene dya ku matuku ônsò. Mushinga wa mpekaatu wakafucibwa. Bukole bwa Sataana bwakacibudiibwa.

⁷⁸ Nenu mpindyewu tudi baswe kumona citudi ne cya kwenza peetu. Mpindyewu, twètù peetu, paakafwa Yesu ku Kàlvaryò apu, ku Kàlvaryò dituku adi, Yèyè kaakafuta anu bwa mpekaatu yetu to, kadi Wakafuta kabidi mushinga ne wakasebela njila bwa twamona mwa kuMulonda; bwalu twètù, bu ba-Adama baakadishinda bakaadi bapikudiibwe. Anu bu muvwa Nyuma ulombola Adama (Adama wa kumpala) ku Nyuma, yèyè uvwa ne bukontononyi bwa bufuki bwônsò, pashiishe twètù (Adama mwibidi), anyi bantu baa pa buloba badi bapikudiibwe kudi Kilisto, kubangila dituku dya Kàlvaryò, tudi mwa kuMulonda. Mpindyewu, paakafwaYe ku Kàlvaryò apu, Yèyè wakasebela njila. Wakalekelela Nyuma, Nyuma Mwimpè, wakaMwaluja pa buloba, bwa wèwè ne mèmè twikale ne mwoyi kudiye. Ke cidi Kàlvaryò kumvwija bwetu twètù, kuMulonda.

⁷⁹ Cyakumpala, kutapamu dísù, kumona cyakenzadi bwetu twètù. Nenu mpindyewu citudi ne cya kwenza ncinyi bwa dyòdi adi? Wèwè ne mèmè cituudi ne cya kwenza ncinyi?

⁸⁰ Mpindyewu, tudi twamba ne: “Ee, mèmè—mèmè’s ndi mwanyishe cyòci aci. Mbîmpè be.” Kadi bidi bikengela twètù kuciitaba. Ne kuciitaba, nkwitaba Mupersona Wende, Kilisto mu mwoyi wetu.

⁸¹ Aapu kaayi, tudi badishikamine ku mpekaatu, ke bwa cinyi kakwena nkanu ya mpekaatu mitulembelele to, nansha kakese. Nzambi, anu bu ne katutu banji kwenzaku mpekaatu kacya to, Mulambu mupwangane ngudi mutuvwiye bapwangane. Bwalu, Yesu wakamba ne: “Ke bwa cinyi ikalaayi bapwangane, anu mudi Taatu wenu mu Dyulu mwikale mupwangane.” Nanku, kakucyena cikwabo cya dyenza nansha, kadi tukaadi bavwijiibe bapwangane mu Bwikadi bwa Nzambi.

⁸² Mpindyewu, ke mwaba awu utudi tujimija kaaba keetu. Twètù katuyi tutangila bîmpè to, tudi tuteeta bwa kutangila paanyima ku cituvwa. Nenu patucidi anu tutangila paanyima ku cituvwa, Mulambu kawena ne cidiwu uumvwija bwetu twètù to. Kaa, kanwenaku mwa kumona anyi, nwènù ekeleeziya? [Disangisha didi dyamba ne: “Amen.”—Muf.] Ncyènàku muswe...Ncyèna muswe kuditacisha bwa kukwata mudimu

awu to. Mémè ncyena mwa kucyenza to, nansha wêwè awu. Kabyena bikengelaku kuditacisha nanku to. Wêwè's udi mujimine, twamb'eku twamb'eku, paudi anu utangila ku byûdi mwenze. Kadi kwikadi utangila ku byûdi mwenze to.

⁸³ Ikala mutangile ku cidi dituku adi ku Kâlvariyo dyenze bwebe wêwè. Dyakafuta mushinga webe. Dyakakosa cilumbu. “Nansha mpekaatu yenu mikunze; mmitooke zee bu nêjè. Mikunze kunzuu bu mashi; mitooke zee bu myôsà ya mukooko.” Nanku kwêna ne mpekaatu to. Mu kantu ne kantu wêwè kwêna ne mpekaatu nansha umwe to. Cyûdi mwenze nansha ciikale cinyi, anyi cyûdi wenza, wêwè udi anu kuyi ne mpekaatu to. Paudi anu mwitabuuje Yesu Kilisto bu Musungidi webe, mpekaatu yebe mmifwidiibwe luse. Cintu cyônsò cidi *cifwidiibwe luse* “ncilekelediibwe ne bacipwe ne mwoyi.”

⁸⁴ Pa nanku cidi cyenza cinyi? Cidi cikupa wêwè, paanyima paa mwine mushingà awu, Nyuma Wende, bwa kuMulonda, ne kwenza cyakenzaYe, bwa bakwabo badi benda balonda. Yêyè uvwa anu Muntu umwe, Muntu mupwangane. Wakafila Mwoyi Wende, ne wakaleeja cileejiu bwebe wêwè. Mpindyewu citudi ne cya kwenza ncinyi?

⁸⁵ Mpindyewu, cintu cya kumpala cîndi muswe kwamba, ncyana ne, Yesu kavwa ne mwoyi bwende Yêyè mwine to. Mwoyi Wende wakafidiibwa bwa bakwabo. Aci, menemene, ke Mwoyi wa Cyendeleele. Paudi wamba ne udi uya mu ekeleeziya, ne wenza bintu bimpè, mbilenga. Kadi paudi ne webe mwoyi anu bwebe wêwè mwine, kwêna ne Mwoyi wa Cyendeleele to. Mwoyi wa Cyendeleele, nkwikala ne mwoyi bwa bakwabo. Byakajaadikiibwa paakalwa Wôwò awu mu Mwânà wa mukooko wa Nzambi. Yêyè wakiikala ne mwoyi, ne uvwa ne Mwoyi wa Cyendeleele, bwalu Yêyè kaakikala ne mwoyi bwende Yêyè mwine to. Wakiikala ne mwoyi bwa bakwabo. Nenku wêwè udi upeta Mwoyi wa Cyendeleele, mpa kwakidila diine dituku adi, kuciya kabidi wikala ne mwoyi bwebe wêwè mwine to. Udi wikala ne mwoyi bwa bakwabo.

⁸⁶ Muntu mukwabo uvwa wamba ne: “Mmunyi mùdi mwa kutwala, ulekela peebe nê nganyi nê nganyi ukwamba mambavi a mushindu awu?” Wêwè kwêna wikala ne mwoyi bwebe wêwè mwine to. Udi wikala ne mwoyi bwa bakwabo, bwa wamona mwa kupikula mwine muntu awu. Nudi nushaala bânà baa balume. Nenku lutatu ludi ne, ekeleeziya ukaadi mupwe mwoyi ne bavwa bânà baa balume. Wêwè's udi mwânà wa balume. Udi wangata kaaba kaa Kilisto. Udi mwânà wa balume, pa nanku kwena wikala ne mwoyi bwebe wêwè mwine to. Ikala ne mwoyi bwa bakwabo.

⁸⁷ “Ee, Mwaneetu Branham, ndi mwa kwikala ne mwoyi bwa ewu mwaneetu, bwalu mu bushuwa bwa bwalu yêyè mmuntu wa maalu mimpè.” Kî ng'aci to.

⁸⁸ Ikala ne mwoyi bwa muntu udi mukukine awu. Ikala ne mwoyi bwa muntu udi mufwanyine kukushipa bu yêyè ne mushindu wa kukushipa. Ke cyakaMwenzelabo Yêyè. BaakaMushipa, ne Yêyè kufwaye, bwa Wamona mwa kubasungila. Ke Mwoyi wa Cyendelele ngwawu. Padibi ne, wêwè, aci ke cidi munda mwebe, aapu kaayi udi mutangile mu Dyulu. Kadi udi ulekelela bintu byebe wêwè mwine, ubilekela, anu mudi mukooko ufila myôsà yawu. Udi anu utungunuka ne kutangila, mèsù ebe ku Kâlvariyo.

⁸⁹ Ndi ntekemena ne eci cidi cinukwacisha bwa nufike mu kaaba kampanda. Ke cidi tabernacle, ke cidi bantu bônsò, cidi cikengela kwenzabo, nkujandula cyûdi wêwè, ne mbwa kiipacila kaayi. Ekeleeziya, kî nkuya mu ekeleeziya anu bwa kuya kimba mijiki, bwa kuya kimba misambu to. Ekeleeziya mmwaba wa dilongolodiibwa ku bilema. “Cilumbulwidi cidi cibangila ku nzubu wa Nzambi.”

⁹⁰ “Tudi ne cya kudibala bu bafwe, kadi biikale ne mwoyi bwa Kilisto.” Nenku, Yêyè wakasebela njila bwa twamona mwa kudifila twêtù biine bu milambu bwa mudimu Wende, bwa kuMulonda Yêyè. Twêtù biikale tuMulonda Yêyè, tudi tusômba nsômbelu wâkasômbaYe. Abi mbilenga be.

⁹¹ Yesu wakacyamba, ne wakaakulapu. Anyishaayi nnupe ndambu naka wa mèyi mamba pa bwalu abu. Teelejaayi ne ntema. Kabinupici to. Yesu wakamba ne, mu Dituku adi Yêyè neatapulule bantu, anu mudi mikooko ne mbuji. Ne neambile mbuji ne: “Imanyinaayi ku dyabakaji.” Ne mikooko ne: “Imanyinaayi ku dyabalume.”

⁹² Nenku Yêyè kwambila mbuji ne: “Ngumukilaayi apa. Bwalu mvwa ne nzala, ne kanwakaMpa cyakudya to. Mvwa mu buloko, ne kanwakalwa kuMmona to. Mvwa butaka, ne kanwakaMpa bya kuvwala to. Mvwa ne nyoota, ne kanwakaMpa cyakunwa to. Mvwa nsaama, ne kanwakalwa kuMmona to. Pa nanku, Ngumukilaayi apa.”

⁹³ Nenku mikooko, Yêyè kuyambila ne: “Mvwa ne nzala, ne nwâkaMpà cyakudya. Mvwa butaka, ne nwâkaMpà bya kuvwala. Mvwa nsaama, ne nwâkaNkwàcisha.”

⁹⁴ Kadi tangilaayi. Kanupangi kuumvwa eci to, nwênù ekeleeziya. Ikalaayi balame bwalu ebu mu myoyi yenu, kashidi. Bwalu abu mbabwenzè kabayi nansha bamanye ne mbabwenzè to! Bantu kabayi babwenza cyenze bu dibanza to. Muntu udi ukupa cintu kampanda anyi cintu kansanga, ne bwalu bidi bikengela anu yêyè mwenze nanku, muntu udi ukupa cyakudya ne bwalu bidi bikengela anu yêyè mwenze nanku, udi ne meeji a budisu. Bikengela ciikale mwoyi webe wêwè mwine, cyenzedi cyebe wêwè mwine.

⁹⁵ Byakapapula bikole mikooko eyi, mu mushindu wa ne yakamba ne: “Mukalenge, Wêwè uvwa ne nzala dîbà kaayi?”

Ne twètù katuyi mwa kuKupa cyakudya...Uvwa ne nzala dībà kaayi, twètù kuKupa cyakudya? Uvwa butaka dībà kaayi, twètù kuKupa bya kuvwala? Uvwa ne nyoota dībà kaayi, twètù kuKupa cyakunwa? Uvwa usaama dībà kaayi, twètù kuKukwacisha?”

⁹⁶ Mbintu biikale bidyēnzèkèle ku dinanga, anu Mwoyi Webe nguvwa musòmbèle munda mwabo. Nzambi, enza bwa bantu bamone cyakenza Kàlvaryiyò bwetu twètù, bintu biikale bidyenzekela.

“Ndībà kaayi diine adi’s Wèwè, Mukalenge? Kacya katutu bamanye ciine aci to.”

⁹⁷ Tangilaayi numone cyakamba Yesu paakakudimukaye: “Mu mushindu unudi benzele aba nunku ewu, Mémè ngunudi benzele awu.”

⁹⁸ Nsòmbelu udi kayi budisu to; kacyi meeji miibìdì to. Kabyi bya kwanji kwela meeji pa bwalu abu to; kadi udi mufwe ku bintu bya pa buloba abi, ne mwikale ne mwoyi mu Kilisto, ne mwikale wendela mu cibeeba mu mushindu wa ne bintu ebi bidì anu cintu cya cidyenzekela nkaayaaci. Wèwè udi ubyenza peebe anu nanku. Kuyi wamba ne: “Ee, mpindyewu, Mukalenge mmuswe, Mukalenge, ngudi muswe bwa mémè kucyenza’s.” Kî ng’aci to. Wèwè udi anu citupa cya ku Yèyè. Nyuma Wende udi munda mwebe, nenku udi wenza mushindu uvwaye Yèyè wenza. Aa! Kwataayi bwalu abu bîmpè.

⁹⁹ “Kudi njila udi umweka bu mwîmpè kudi muntu, kadi ndekeelu wende mwikale njila wa lufu.”

¹⁰⁰ “Kî mbònsò badi bamba ne: ‘Mukalenge, Mukalenge,’ baabwela to, kadi aba badi benza diswa dya Taatu Wanyi,” bifumina anu mu myoyi yabo, babyenza paabo cyanaana.

¹⁰¹ Mpindyewu, dituku adi ku Kàlvaryiyò dyakafuta mushinga awu, bwa twamona mwa kwikala mushindu awu.

¹⁰² Kî nkwamba ne: “Udi mumanye’s, mukaji mukamba Jones uvwa musangu mukwabo...Wakapangila makala, ke mémè kuya e kumusumbila ndambu wa makala. Nyawu nkwambila’s, mvwa mumone mwaneetu wa balume mukwabo ukenga bwa kupeta anu nkooci wetu wa divwala ewu, ke mémè kuya kamupetela nkooci wa divwala. Nzambi abeneshiibwe’s we! Mémè’s ndi mwena Kilisto.” Ekelekele! Wèwè mudisu naanyi we, mukwate ne bya luse, mwena dikenga. Wèwè’s udi mwena lubombo.

¹⁰³ “Cyanza cya dyabalume kacimanyi cidi cyanza cya dyabakaji cyenza, ne cya dyabakaji kacimanyi cidi cya dyabalume cyenza to.” Mufwe mu Kilisto biikale bidyēnzèkèle, mu mushindu wa ne udi ucyenza, nansha bishi. Nngiikadilu webe. Ke mwebe peebe mudibo bakwenze. Udi ucyenza, nansha bishi. Cidi m’Mwoyi udi musòmbèle munda mwebe. Udi mudifile wèwè yònsò kudi

Nyuma awu, ne Udi anu bu Yêyè mwine ne mwoyi munda mwebe. Kaa, nwênù's nudi nuumvwa Nyuma mubenesha awu, Mwoyi awu! “Kî mmêmè udi ne mwoyi,” mwakamba Pôlò, “kadi Kilisto ngudi ne mwoyi munda mwanyi,” biikale bidyenzekela anu naka.

¹⁰⁴ “Ee, nyawu nkwambila's, Mwaneetu Branham, twêtù's ke badi beena Kilisto muneemu emu. Tudi twambulwisha *aba*. Twambulwisha *baba*.” Ekelekelee! Bundu bwenu. Kî ng'aci bwena Kilisto to.

¹⁰⁵ Bwena Kilisto budi ne cya kubyenza biikale bidyenzekela. Bidi ne cya kwenjiibwa. Ne wêwè mwine ubipwa ne mwoyi, byônsò bya ne: “Kadi mêmè to.” Ndaaku, wënzè nanku.

¹⁰⁶ Kilisto uvwa mufile Mwoyi Wende wônsò nkòng kudi Nzambi. Uvwa mudifile Yêyè mwine, bu musadidi wa patooke, kudi bantu. Wakafila mwoyi Wende, cyanaana. Kacivwa bu ne ndibanza bwa kucyenzaye to. Kaakacyenza ne mwoyi mukwacidile to. Kaakamba ne: “Mpindyewu, nwênù bânà beetu, bivwa bikengela kuNgeelaku meeji àbûngì, bwalu ndi mulwe bwa kunufwila” to. Kaakambaku dîyi nansha dimwe pa bwalu abu to. Wakafwa, nansha nanku, bwalu civwa n'Nzambi munda Mwende.

¹⁰⁷ N'Nzambi munda mwebe, n'Nzambi munda mwanyi, mwikale utufikisha ku ditangila bakwabo. Mikooko, luseke lukwabo.

¹⁰⁸ Umwe wabo neãmbè ne: “Ee, Mukalenge, mêmè's ngâkenza *cikampanda*. Kabidi, Mukalenge, ngâkenza *cikansanga*.”

¹⁰⁹ Yêyè ne: “Ngumukilaayi apa, nwênù beena mudimu baa bubu. Ncitu nanshà kacya munumanye to.”

¹¹⁰ Bu ekeleeziya mwa kufikaku ku malelela a nshindameenu, a ne kî ncintu cyûdi wêwè uteeta kwenza, cyûdi uditacisha wêwè bwa kwenza. Ncintu cidi cilediibwe munda mwebe.

¹¹¹ Wamfwaku luse, wêwè mulunda wanyi mwena Mpenta. Mêmè ewu ndi mwena mpenta. Kadi balunda baanyi beena Mpenta bakaadi bafike too ne ku ne, bikengela kwikale mijiki yâbûngì yaa—yaa lukasalukasa, batuuta ngoma kudi bisumbu kampanda, anyi dituuta dya bikashi, anyi tutumbi, bwa kusalula dyela dya mbila. Abi's bidi anu disaluka cyanaana. Batu bimba mu bisumbu kumpala kwa kuya ku mvita. Batu babweja bantu mu disaluka dya kulwa mvita. Ntu ngitabuuja mu mijiki. Ntu ngitabuuja mu dituuta dya byanza. Kadi ntu ngitabuuja mu byôbi bintu ebi. Ncya bushuwa menemene. Bikengela twikale naabi.

¹¹² Kadi's nyawu nudi bashiye bintu bya binene kabiyi byenza to, ke mwoyi wa didifila awu udi uleeja ne Nzambi udi ne mwoyi munda mwenu, mwikale udyenzela bintu bidi bîmpè bwalu mbîmpè. Utungunuka anu nanku, kuyi ukwelela meeji nansha

makese to. Mwikale anu naaci bu ne ke webe mwoyi. Nenku tangilaayi, nudi numona cidi munkaci mwa dyenzeka. Udi anu . . . kwêna . . . Udi mu cibeeba. Ke civwa Kâlvariyo kumvwija bwebe wêwè, mu cibeeba, kakangule njila awu bwebe wêwè.

¹¹³ Mpindyewu, wavuluka mpindyewu ne, kwêna mwa kwikala luseke mbuji luseke mukooko to. Kayakubwelakanaku to.

¹¹⁴ Mpindyewu, kudi bantu bààbûngi bamba ne: “Eyo, kadi udi mumanye mudi bwalu? Tudi ne bulongolodi mu musumba wetu. Twêtù, tutu twambulwisha bapele. Tutu twenza *bikampanda*.” Abi bidi anu bîmpè, kadi’s nyawu nudi nudyelela nwênù biine mpungi bwa cyôci aci. Kanwenji nanku to.

¹¹⁵ “Fila kaa pa luse keebe mu musokoko,” mwakamba Yesu. Biikale bidyenzekela, cintu kampanda bwebe wêwè, kacyi cishiilangane ne kuya, kwangata mâyi kunwa to. Udi ne nyoota. Pakaadi muntu udi mulondele awu ne nyoota, umwelelaku meeji, yêyè pende. Muntu wâlondela awu mwikale ne dijinga, umwelelaku meeji anu mushindu umweumwe ûdi mufwanyine kudyelela bwa dyebe dijinga awu. Nenku kukutumu meeji nansha makese to. Tungunuka wêwè anu ne kwikala ne mwoyi.

Mpindyewu, kwêna mwa kwikala luseke mbuji luseke mukooko to.

¹¹⁶ Pa nanku wêwè mwambe ne: “Ee, wetu ekeleeziya’s udi ne bulongolodi. Tutu tupa bapele bintu, kabidi tutu twenza *bikampanda*, twenza *bikansanga*, twenza *bikankenga*.”

¹¹⁷ Nwênù ne aci kadi kanuyi ne cikwabo to, Nyuma wa Kilisto munda mwenu, nudi peenu nucyenza anu mu cijengu cya menemene eci. Yesu . . . Pôlò wakamba, mu Kolinto wa Kumpala 13 ne: “Nansha mêmè mufile bintu byanyi byônsò bwa kudiishabo bapele, ne mufile mubidi wanyi bwa kuwoshabo bu mulambu, kabyena binkwacisha nansha kakese.”

¹¹⁸ Mpindyewu, eci ncikole, kadi m’Bulelela. Bikengela ukafike ku aci cyenzedi, ujingulule cidi Kâlvariyo kenze bwebe wêwè. Tudi tukâtângila, twamba ne: “Ee, eyo, mbîmpè.” Kî ng’aci to. Piikalabi ne byakakengela bwa Mwânà wa Nzambi awu kuyaye ku Kâlvariyo, bwa kupoopediibwa pa nkuruse, mwânà wa balume yônsò udi ulwa udi ne cya kuya ku Kâlvariyo kampanda. Udi ne cya kwikala pende ne kende Kâlvariyo. Udi ne cya kwikala ne dituku adi dya Kâlvariyo. Bikengela ngikale ne dituku adi dya Kâlvariyo. Aci nciidi cikosa bwalu bwa mpekaatu. Kî mbya kulabula muyiishi ku cyanza to; kî mbya bakubweja mu ekeleeziya mu dikunyukusha to; kî mbya kubwelamu ku mukanda mufunda to; kî mbya kubwelamu ku dijikula to. Kadi kubwelamu ku Dilediibwa. Yêyè kaakafilaku mukanda mufunda to. Kaakafilaku dijikula kampanda to. Wakafila Dilediibwa. Mushindu awu ke utudi tubwela. Pashiishe, kubangila apu, tuti tusômba nsômbelu wa bwena Kilisto biikale bidyenzekela.

119 Mpindyewu, bwalu bukwabo bwa dileeja. Luseke mbuji, luseke mukooko, kabeena ne cintu cya mushindu awu to. Anyi udi mbuji anyi udi mukooko. Kwèna luseke mbuji luseke mukooko nansha. Anyi udi mbuji anyi udi mukooko.

120 Mpindyewu, pawikala anu wenza bintu bîmpè, nenku wela meeji ne udi mwa kubwela, ku byôbi abi, nenku kî nkufwanyine kwikala dituku dya Kàlvaryò to. Mikenji ikaavwa mifile byôbi abi. Kadi, bu muvwabi ne bivwa bikengela dituku dya Kàlvaryò, bu muvwabi ne mbwa kubweja cyôci aci, bwa katulu kushaala anu bidimba bya ekeleeziya cyanaana, kadi bwa twikale bânà baa balume ne baa bakaji baa Nzambi. Ke civwa dituku dya Kàlvaryò ncyaci. Ke civwadi dyumvwija bwebe wêwè, bwa wamona mwa kwenza, ne kulonda, ne kwenza maalu bu Yesu.

121 Mpindyewu, musulu kautu luseke ubanda luseke upweka, musangu umweumwe awu to. Musulu utu uya mutangile luseke anu lumwepele. Ne Nyuma wa Nzambi udi uya mutangile luseke anu lumwepele. Katu ubwejakaja bintu ne Yèyè pamwe nansha. Udi uya mutangile luseke anu lumwepele.

122 Tangilaayi Yesu, nkaadi njikija. Yesu wakamba ne: “Byenzedi bîndi ngenza nenûbyènzè peenu, ne nenwènzè binene bipite ebi, bwalu nyaaya kudi Taatu Wanyi.”

123 Kî ngekeleeziya ewu ûndi ntamba kwambila bwalu ebu nansha. Nwènù nudi nuumvwa. Kadi Mayiisha aa mmakwata pa mikaba. Bantu binunu makumi badi baateeleja, buloba bujima.

124 Nèngàdamunè lukonko alu bwa mwena kadyuwu, mpindyewu ewu. Bantu batu bangambamba misangu yàbûngì. . . bambambe. Batu bamba ne: “Mona’s, utu witabuuja Bible? Yesu’s wakamba ne: ‘Byenzedi bîndi ngenza ebi nenûbyènzè peenu, ne nenwènzè binene bipite ebi, bwalu nyaaya kudi Taatu Wanyi.’”

125 Mmunyi mùdi mwa kunyanguka mushindu awu, mukalenge? Mmunyi mùdi mwa kwikala ulalakana kule ne dijingulula mushindu awu, ne mamanya ebe a mu mutu a dilongela dya Nzambi mu tulaasa awu, ne didifwikakajila dyebe dya cintu kana cyònsò mu mutu adi? Wêwè mulunda wanyi mukwate ne bya luse ne mujimine ewu, kwèna mwa kuumvwaku ne Bible ewu mmu nyuma mudibo bamuumvwije anyi?

126 Yesu’s wakasakidila Taatu bu muvwaYe musokoke Cyôci aci kudi badi balonge tulaasa, ne beena budimu, ne beena lungenyi, ne beena meeji, ne muvwaye mwa kuCisokolwela bânà bu baa bwena bavwa mwa kulwa ku Kàlvaryò.

127 Tangilaayaaku mpindyewu. Yesu ngudi mwambe. Tangilaayi mwàkabwàmbàYe: “Byenzedi bîndi ngenza,” n’Yèyè ewu munkaci mwa kubyenza mpindyewu ewu. “Byenzedi bîndi munkaci mwa kwenza mpindyewu, kwondopa kwa babeedi, kubiisha kwa bafwe, kutabaja kwa mèsù a bampofu, byenzedi ebi nenûbyènzè peenu. Nenwènzè byôbi ebi panwikala

bangitabuujje Mémè. Nudi nwenza byenzedi ebi. Ne pashiishe nenwènzè binene bipite ebi, bwalu nyaaya kudi Taatu Wanyi.”

¹²⁸ “Katanci kakese aka, baa pa buloba kabaakuMmona kabidi to, kadi nwènù nenuMmone. Nèngikalè neenu, munda mwenu mene, too ne kundekeelu kwa buloba. Ncyakunushiya kanuyi busambi nansha. Nèndombè Taatu; Yèyè neanutumine Musambi mukwabo, ke Nyuma Mwímpè mene, udi baa pa buloba kabayi mwa kupeta; kadi, nwènù nudi mwa kuMupeta.”

¹²⁹ Mpindyewu monaayaaku. Byenzedi “bipite bunene,” biwva nkupeta Bukole mu Ekeleeziya, kabiyi anu bwa kwondopa babeedi ku disambila, kwipata badémons ku disambila, kadi kufila Mwoyi wa Cyendeleele kudi beena kwitabuujja. Nyuma Mwímpè uvwa ulwa, ne mmufidiibwa mu byanza bya Ekeleeziya, bwa kufila Mwoyi. Kaa! Ke civwa Kàlvaryòd kumvwija ncyaci. Kavwa kangata balume ne bakaji baa nsömbelu wa ciipanshi ne bapwekeshiibwe milongo, kadi kubabandisha mu mwaba kampanda, bwa kwikalabo bânà baa balume ne baa bakaji baa Nzambi, bwa kwondopa babeedi ne kufila Mwoyi wa Cyendeleele; mu kufila kwa Nyuma Mwímpè kudi beena kwitabuujja baa butumike, bantu bavwa kala wawa biikale beena bupidya, kubavwija beena kwitabuujja, ne kufila Mwoyi wa nyuma, wa Cyendeleele. Mushindu kaayi awu udibi bipite bunene, bwa kwamba . . .

¹³⁰ Mubeedi mukaji udi mulaadika kaaba aka ewu, ndi mwa kusambila disambila dya diitabuujja ne yèyè kwondopiibwa. Aci’s ncintu cinene. Ke civwaYe wenza cikondo aci.

¹³¹ “Kadi,” mwakambaye, “nenwènzè binene bipite ebi. Nènnùpè Bukole, kabuyi anu bwa kumujuula kuulu bwa katanci kakese to, kadi bwa kumupa Mwoyi wa Cyendeleele, wikalà wa Cyendeleele, kashidi.” Nwènù bantu bakwate ne bya luse aba, bampofo, bakengeledi, mudi aci cinupita mbishi? Kanwenaku numona ne cintu cidì “cipite bunene” ncinyi anyi? Cyòcì aci ke cintu cipite bunene civwa cifwanyine kwenzeka, civwa nkufila Mwoyi wa Cyendeleele kudi bantu. Mwoyi wa Cyendeleele ncinyi? Mwoyi uvwaYe naawu awu, Mwoyi uvwa munda Mwende awu, KuWufila kudi bakwabo. Muntu udi mwa kwenza aci anyi? Mwânà wa Nzambi kampanda udi mwa kucyenza.

¹³² Yesu wakamba ne: “Ewu yònsò unwalekeleela mpekaatu awu, neyikale mimulekelediibwe; ewu yònsò unwalaminyina mpekaatu awu, neyikale mimulaminyina.”

¹³³ Mpindyewu ke mwaba awu udi ekeleeziya wa Katolike ne mikwabo yàbûngì myenze cilema cyayi cinene. Badi bapatuka bamba ne: “Ngaakufwidi luse ku mpekaatu yebe.” Kacivwa aci nansha.

¹³⁴ Mibi yabo ivwa ifwidiibwa luse bishi, mu Bible? Peetelo’s wakandamuna ku lukonko alu, Dituku dya Mpenta. Bòbò baakamba ne: “Tudi mwa kwenza cinyi bwa kusungidiibwa?”

Mmunyi mutudi mwa kupeta Eci cinudi naaci?" Ke yêye kufundaye kabeji kaa bwanga. Ke kubambilaye cya dyenza.

¹³⁵ Kwambaye ne: "Nyingalalaayi, muntu ne muntu wa kunudi, kudi Nzambi, nubatiijibwe mu Dîna dya Yesu Kilisto." Bwa cinyi? Dilekelediibwa dya mpekaatu wenu. Ke byenzedi "bitambe bunene" mbyôbi abi.

¹³⁶ Mbanganyi, nwênù bayiishi mu dinda emu, mbanganyi, nwênù badi munkaci mwa kuteeleja Dîyi dyanyi pa mukaba wa mêyi, badi baswe kuya ku Kàlvaryò mu dinda emu? Ne kutangila cidi Nzambi mwenze bwenu nwênù. Ne kulekela twitabaayi yenu ya cyena mangumba ayi, kuyiisha Evanjeeliyo. Aleluuyah! Bwalu mbukwela pambidi mpindyewu. Newènzè cinyi ne Cyôci aci?

¹³⁷ "Bwalu kanyinganyinga ne dilekelediibwa dya mpekaatu bidi ne cya kuyiishiibwa mu Dîna Dyende, kudi baa pa buloba bujima, kubangila mu Yelusalema." Aleluuyah! Butumbi's we! Ke wêwè awu's.

¹³⁸ Kàlvaryò kadi kumvwija cinyi bwebe wêwè? Dituku adi ndifwanyine kukwenzela cinyi? Ndikupaye, ne mamanya a Nzambi a mu tulaasa anyi? Ndikuvwije muntu mudyambi anyi? Anyi ndikuvwije mwena Kilisto, mwikale wa mudifile ne kasuki? Aleluuyah!

¹³⁹ Mpekaatu, mulekelela! "Nwênù nenwènzè byenzedi binene bipite ebi." Nudi numona ne ba "nwênù" abo mbanganyi, kî mmwômò anyi? "Byenzedi binene bipite ebi," dilekelela dya mpekaatu, mu Dîna dya Yesu Kilisto.

¹⁴⁰ Kadi ku twitabaayi ne mangumba, ne bikwabo, mbikuswike pa kaaba kampanda, uci anu ukwacila maalu a pa buloba mudimu. Ungambile mulume kampanda, ungambile mukaji kampanda, udi mwa kulwa ku Kàlvaryò kadi kuteeta bwa kwikala kampanda wa munene ne bwalu muntu kampanda nyawu mwambe cintu kampanda. Undeeje mwaba ûdi mwa kutangilangana ne Kàlvaryò mpala ne mpala, mu mushindu udiku menemene, dituku adi ku Kàlvaryò. Mmunyi mùdi mwa kwikala ne dituku dyebe ku Kàlvaryò, kadi kupatuka mwikale muntu mudyambi? Mmunyi mùdi mwa kupatuka mwikale muntu wa benzeja maalu kudi bulongolodi kampanda, ne mwikale uyiisha malongesha kampanda makwatakaja kudi bantu? Mbwa cinyi cintu eci kaciyiku mwa kukupwekesha kumpala kwa Dîyi dya Nzambi? Wêwè anu mwa kuya kwôkò, neupatuke mudipwekeshe. Mmunyi mùdi mwa kuswa bwa kwikala cintu kampanda cya cinene mu bulongolodi bwenu, ne disala dyasa ku cifulu, padibi ne Yesu Kilisto Mwânà wa Nzambi wakaDipwekesha too ne ku mubidi musunsulula, ne mpala mutwila mate, mu mushindu wa bundu ne dipwekeshiibwa dya milongo? Wa bwalu kuMuvuulabo bilâmbâ, kuMupoopelabo pa nkuruse, baa pa buloba batangile. "Wakadyombola bundu."

Mmunyi mùdì mwa kuya ku Kàlvaryò kadi kukufuma cintu kampana cishiilangane ne civwaYe, dipwekeshiibwa dya milongo, bundu?

“Kaa,” mùdì wamba, “nebangipate.” Bakwipate mwine’s.

¹⁴¹ Peta dyebe dituku ku Kàlvaryò, Nzambi neikale ne Wende mushindu wa kwenza neebe. Anyishaayi nteele cyakabidi diyì adi. Peta dyebe dituku ku Kàlvaryò, Nzambi neikale ne Wende mushindu wa kwenza neebe.

Tusambilaayi.

¹⁴² Mukalenge, Eyi Nzambi, banda neetu bônso ku Kàlvaryò anu mpindyewu ewu. Tushiyangane ne twètù biine, Mukalenge, diciina dya bantu, diciina dya cyambabo kudi muntu kampana mukwabo. Mona’s, baa pa buloba bônso’s baakaMuseka, bôbò kuMwelulwila. Kadi Yèyè uvwa anu ne butumike, too ne ku lufu. Uvwa ne butumike, too ne ku dipwekeshiibwa dya milongo. Uvwa ne butumike, nansha mene kudi bukalenge bwa cinsangansanga.

¹⁴³ Ne tudi tufika ku dyumvwa ne paakatuuta Sataana buloba ebu, yèyè ngwâkashààla mfumu ne mukookeshi wa buloba ebu. Wakajaadika cintu cimwecimwe eci kumpala kwa Mukalenge wetu, wamba ne: “Makalenge aa ngaanyi mèmè. Nèngènzè naawu cindì muswe.” Nenku tudi tufika ku dyumvwa ne, kubangila ku diine dituku adi ne leelu ewu, buloba ebu, mwinshi mwa mulawu, mbukookesha kudi yèyè mene wâkabwèla mulawu awu.

Kadi, Nzambi, Eyi Nzambi, Bukalenge butudi twètù tukwacila mudimu mbudi kabuyi bwela mulawu to.

¹⁴⁴ Taatu, Nzambi, mushindu mwine udibi bikemesha ne, Wèwè udi mwenze bimwe bintu binene mu—mu bintu bya bindidimbi leelu ewu. Wèwè kwitaba bwa ne mikaba ya bindidimbi minene eyi, bu mudi *Mikenji Dikumi*, ne bikwabo, ipatuke, bwa kwitabila balume ne bakaji bwa kumonabo, bôbò mene bavwa kabayiku mwa kudyata dikàsà dyabo mu ciibi cya ekeleeziya, kadi ubiitabila bwa kumonabo cidi bwalu. Njila wa Nzambi utu njila udibo babenga, kudi baa pa buloba. Bwalu twètù tudi bu mudi. . .Tudi tubwela mu Russie mudibo balombola kudi communismisme.

¹⁴⁵ Twètù tudi pa buloba ebu, kadi katwena baa buloba ebu nansha. Tudi baye ku Kàlvaryò. Tudi badipoopole twètù biine ku nkuruse, bwa Bukalenge bwa Nzambi, bwa kwikala umwe wa ku badi Bende Yèyè. Baa pa buloba nansha bambe cinyi, twètù tudi tulonda njila pamwe ne banyaabanya badyombola baa Mukalenge. Tuyaaya anu kuya too ne ku dibiishiibwa dya ku lufu, ne tudi twitabuuja ne dikaadi pabwìpì menemene, Mukalenge, too ne patwabiishiibwa mu Bukalenge bwikala ne cya kukookesha buloba ebu. Anu mwakadyanjila Danyele kubumona, bwôbò bwakasunsulula buloba bwônso,

kubushiya anu bisote bipeepele, nenku lupeepele kubipeepula ne kubyumusha panshi paa cishiipwidi mu movù wa luuya. Kadi, mukuna awu, ke Dibwe adi kudyunda kwandamuka mukuna munene wakabwikila buloba bujima. Dibwe adi nedilwe. Eyi Nzambi, tudi baswe kwikala citupa cya bwôbô abu. Tudevileku twêtù biine, twambule nkuruse wetu ku dituku ne ku dituku, twikale ne mwoyi bwa Kilisto, twikale ne mwoyi bwa bakwabo. Twënzèlèku nanku's, Mukalenge.

¹⁴⁶ Kwôkò kwikale mukwabo kaaba aka mu dinda emu, mwikale kayi muMumanye bu Musungidi, ne mwikale ujinga bwa kumuvulukabo mu disanmbila dya kwoya naadi edi, ne mwikale ujinga ne edi dituku diikale dyebe dya ku Kālvaryò, anyishaku wèlè byanza muulu, wamba ne: “Nsambidileku, Mwaneetu Branham. Ndi muswe kuMumanya bu Musungidi wanyi.” Nzambi akubeneshe, nsongalume. Kudi mukwabo anyi? Nzambi akubeneshe, mwaneetu wa balume paanyima paapa.

¹⁴⁷ Nkufwanyine kwikalaku mukwabo anyi? Wamba ne: “Ndi muswe kuMumanya. Ndi muswue edi dituku diikale dya ku Kālvaryò, bwanyi mêmè. Ndi nsaama ne mucyoke. Bidi ne dikwacisha kaayi bwa kupeepeja cintu ciine cingākalediibwā bwa mêmè kucyenza? Ngākalediibwa, mulediibwe bwa kwikala mwānā wa Nzambi, kadi mona anu mūndi mwaba ewu kacya ngaakwata ku bintu bya pa buloba. Nzambi, mpoopediibwe ku nkuruse leelu. Ndipoopele, leelu, mêmè mwine ne meeji aanyi mêmè mwine, bwa ngaamona mwa kwikala ne mwoyi pamwe ne Kilisto, ne kwikala ne mwoyi bwa bakwabo. Nansha bôbô bangerze cinyi, kungelulwila, ne kunkengusha, ne kungamba maalu ônsô mabi, ne bikwabo, ngëndè anu naabo ne kudipwekesha, ne bupole, bu mudi mwānā wa mukooko, bu mwakenzaye Yêyè. Dituku kumpala eku, Yêyè mmulaye bwa kunjuula cyakabidi ku lufu, ku Dituku dya ndekeelu. Dituku adi ndīndi mwindile edi.” Nkufwanyineku kwikala bikwabo byanza bidi mwa kjuuka anyi? Nzambi akubeneshe lwa mundekeelu mwamwa, ne wêwè. Mbîmpè. Bakwabo kabidi anu. . . Nzambi akubeneshe. Nzambi akubeneshe. Bakwabo kabidi, kumpala kwa twêtù kusambila.

¹⁴⁸ Taatu wetu wa mu Dyulu, batu bambe, paakayiisha Peetelo mu Dituku dya Mpenta ne: “Bûngî bwônsô bwa baakitabuja baakasakidiibwa ku Ekeleeziya.” Bavwa biitabuuje bushuwa ne mwoyi wabo wônsô. Bantu bāfumu ku dyela byanza muulu aba, mêmè ndi ngitabuuja ne mbiitabuuje ne mwoyi wabo wônsô. Nenku piikalabi ne mbiitabuuje, kudi ciina cya mâyi cindile mwab'ewu. Mbaswe bwa mpekaatu ayi ifwidiibwe luse. Kudi mintu mwab'ewu udi mwa kubatitiiza mu Dînā adi, Dînā mene dimwepele didiku mwinshi mwa Dyulu dyakapeebwa munkaci mwa bantu, mwa twêtù kusungidiibwa.

¹⁴⁹ Bwalu, anu mûngätèèdi Mufundu awu kukaadi tusunsa, ne: “Kanyinganyinga ne dilekelediibwa dya mpekaatu bidi

ne cya kuyiishiibwa mu Dîna Dyende, kudi baa pa buloba bujima, kubangila mu Yelusalema.” Ne mu Yelusalema mwine, paakayiishiibwa kanyinganyinga ne dilekelediibwa dya mpekaatu, mupostolo wakabambila bwa Mifundu eyi, wamba ne bavwa ne cya “kuningalala, dyambedi, ne pashiishe kubatiijiibwa mu Dîna dya Yesu Kilisto.” Awu mudimu uvwa ngwa benza kudi muyiishi. Cyabo nkuningalala, ne cyende nkubatiiza bwa dilekelediibwa dya mpekaatu wabo. “Ewu yônsò unwalekelela mpekaatu awu, neyimulekelediibwe; ewu yônsò unwalaminyina mpekaatu awu, neyimulaminyiibwe.”

¹⁵⁰ Taatu, mmunyi mwakalaluka baa pa buloba mu cilunji cya ciji bu mudibu naaci emu? Mbwa cinyi kubenga kwitabuuya Evanjeeliyo mupepele ewu? Bya bwalu badi beelamu, bwa cyôci aci, bwa kuteeka pa kaaba kaaci: mênà a mafi, dibatiiza dya mafi, mabatiiza a Nyuma Mwîmpè a mafi, dilabula dya bambi ku cyanza, bakwata mudimu ne myânzù ya Taatu, Mwânà, Nyuma Mwîmpè, bidi kabiyiku mu Mifundu to; mukanda mwenza kudi bantu baa beena Loomo, kacyi dilongesha dya bwena Kilisto kaaba nansha kamwe mu Bible. Dilekelediibwa dya mpekaatu kadyena mwa kulekelediibwa mu mwânzù nansha, kadi mu Dîna dya Yesu Kilisto.

¹⁵¹ Mpindyewu, Taatu, tudi bamanye ne kî cya mwasakanaayi to. Yebe njila itu misangu yônsò anu mushindu awu. Kadi enza bwa balume ne bakaji, mu dinda emu, bafike too ne ku dituku adi, dituku adi ku Kâlvariyo. Kwôkô aku, Yesu, dituku adi, mudyombole bundu abu, bwa divuudiibwa dya bilâmbà, bwa disunsuludiibwa, bwa ditwidiibwa dya mate, ne bwa dyelulwidiibwa; kudi baa pa buloba bujima, kudi ekeleeziya, kudi bantu biine bavwa ne cya kwikala baMunange. Ne, nansha nanku, mu biine byônsò abi, Yêyê kaakabuululaku mukana Mwende to, kadi wakaya anu kafwila biine bantu bavwa baMwelulwila abu.

¹⁵² Nzambi, nda neetu ku Kâlvariyo mu dinda emu. Nenku piikala bantu bambe ne tudi ne dipaala, bamba ne tudi bumvwe Mifundu bibi, cyônsò cyaswabo kwamba aci, Nzambi, kabeena mwa kwimana mu Bwikadi bwa Nzambi kadi kwamba ne ncyà mafi to.

Bôbò kabeena mwa kubwikilaku mpekaatu yabo ne Bible to. Bible udi ubuulula mpekaatu yabo uyishiya patooke: bupidyà bwabo; kwikala bamanyike; kwenza mudi bakwabo baa mu musumba awu benza. Enza balwe ku Kâlvariyo mu dinda emu.

¹⁵³ “Ne kubangila mu Yelusalema; kanyinganyinga aku ne dilekelediibwa dya mpekaatu bidi ne cya kuyiishiibwa mu Dîna Dyende ku matunga ônsò, kubangila mu Yelusalema.”

Enza bêlè cidya cimwecimwe cya dipoopediibwa dya pa nkuruse aci bwa kusunsuludiibwa; ne kutwidiibwa mate; ne kwelulwidiibwa; ne kutwibwa mênà ônsò adibo mwa kutwibwa

ne mbantu babenge diitabuuja baa mu maalu a Nzambi; bapanduludi baa ekeleeziya; mènà ònsò aswabo kubatwa awu.

Twètù, Mukalenge, mu dinda emu, tulonde njila pamwe ne banyaabanya badyombola baa Mukalenge. Twèndè mwakenda bapostolo, katuyi tuseesuka nê nku dyabalume nê nku dyabakaji, kadi tusadile nzambi byumukila mu bwakane bwa myoyi yetu. Twènzèlèku nanku's, Taatu.

¹⁵⁴ Mpindyewu, ondopa babeedi ne beena ntatu badi balwa mu mulongo wa babeedi ewu. Aba badi beele byanza muulu aba, mu myoyi yabo, banyingalale, mpindyewu ewu. Aba badi bashaale kacya biimana kuulu lwa paanyima paapa mukungùlù mule, baye lubilu ku mâyi bwa bapete kulekelediibwa kwa mpekaatu yabo biimanyine pa Dîna dya Mulambu, Yesu Kilisto, Mwânà wa Nzambi. Amen.

Ku nkuruse kwakafwila Musungidi wanyi,
Nkúngààkadilà bwa kukezudiibwa ku
mpekaatu;
Nkwakamyaminyiibwa Mashi pa mwoyi
wanyi;
Butumbi kudi Dyende. . .

Butumbi kudi Dîna Dyende!
Kaa, butumbi kudi Dîna Dyende!
Kaa, nkwakamyaminyiibwa Mashi pa mwoyi
wanyi;
Butumbi kudi Dîna Dyende!

Ndi musungidiibwe mu mushindu wa dikema
ku mpekaatu, (Mushindu kaayi nanku awu?)
Yesu mmusòmbèle munda emu ne kalolo
kònsò,
Ku nkuruse kwaka kuvwaYe. . . (Ikala umwe
wa ku badi Bende.) mwòmò;
Kaa, butumbi kudi Dîna Dyende!

Butumbi kudi Dîna Dyende!
Butumbi kudi Dîna Dyende! (Dîna dya
mushinga mukole.)
Kaa, nkwakamyaminyiibwa Mashi. . . mwoyi
wanyi;
Butumbi kudi Dyende. . .

¹⁵⁵ Aci kaciyena cikwenzaku wêwè cintu anyi? S'cidi cikukupula bwa kuumisha. Cidi citeeka ditekemena munda mwebe: Mwoyi, Mwoyi wa Cyendelelele.

¹⁵⁶ “Mupoopediibwe pa nkuruse ne Kilisto” ncinyi? Nkwikala ne mwoyi bwa bakwabo. Bakwabo baa mushindu kaayi? Badi bakukine abu, badi kabayi baswe kukunanga abu, badi baswe kukwelulwila abu: ikala ne mwoyi bwabo bòbò; ikala naabo; ubanange; “nusambidile aba badi banusubisha abu,

banushiminyina maalu mabi a mishindu yônsò, bwa Dîna Dyanyi. Baakakengesha baprofeta baakalwa kumpala kwenu.”

¹⁵⁷ Mvwa mwele meeji ne diyiiisha edi divwa misangu mikwabo mwa kukwacisha ekeleeziya mu dinda emu, bwa nwafika ku dimona ne tudi dijinga ne Kâlvariyo, ne tudi dijinga ne dipoopedibwa pa nkuruse.

¹⁵⁸ Mpindyewu byônsò abi mbyenze cinyi? Byônsò mbimana kufuta. Mwanetu wa bakaji udi mu dikalu dya balema ewu, kudi bantu badi mwab'ewu aba biikale basaama ne mu ntatu: Byônsò mbimana kufuta; cintu cimwepele cidi cikengela wêwê kwenza nkwitabuujà ne mbyebe wêwê, kuciiabuujà mu mushindu umweumwe awu, nanku newondopiibwe.

¹⁵⁹ Nwavulukaayi: Mpindyewu ncinyi? Udi mufwanyine kuya kudi baa pa buloba, kuyiisha Evanjeeliyo, kwondopa babeedi; ne kufila Mwoyi wa Cyendelele.

Mushindu mwine udici cifwanyine kwikala citambe bunene: cya, muntu nyèyè ewu mulaadika kaaba aka ne—ne cyûjà, kansere, cyônsò cidiku aci. (Tukaadi baMumonemone misangu yâbûngì ufila mabeneshà Ende ne wondopa mulume awu, wondopa mukaji awu; binunu makumi kuvudija ku binunu makumi a maalu atu kâyikù manji kupangila mu nyungulukilu wa buloba bujima, nwamonu's, ubajuula mu tulaalu twa babeedi, tulaalu twa dyambwila babeedi; anu mindidimbi naka ya bantu bakaavwabo bakunye kudi kansere; lelu ewu, mbasangale, ne mubidi tumatuma.) “Byenzedi bindi ngenza ebi nenûbyênzè peenu; kadi nenwênzè binene bipite ebi”: “byâbûngì bipite ebi,” ke cidi cijaalame.

Cinyi? Mvwa mbapa dileepesha dya mwoyi, mu Dîna dya Yesu, bwa kuleepesha mwoyi wabo bwa ndambu wa matuku.

Kadi: “Nenwênzè binene bipite ebi: nenubape Mwoyi wa Cyendelele mu Dîna Dyanyi.” Yoyôyò!

¹⁶⁰ Mbwa cinyi mùdi mufwanyine kuumvwa bundu bwa Dîna adi dya mushinga mukole? Mbwa cinyi budi bantu mwa kudinyeema ne kuseemena kule naadi? Awu ndyabulu. Cya bushuwa.

¹⁶¹ “Kanyinganyinga ne dilekelediibwa dya mpekaatu bidi ne cya kuyiishiibwa mu Dîna Dyende kudi baa buloba bujima, kubangila mu Yelusalema.” Ke kwakapatukila Mukenji dyambedi. Mmwômò anyi? “Kanyinganyinga ne dilekelediibwa dya mpekaatu bidi ne cya kuyiishiibwa mu Dîna Dyende, kubangila mu Yelusalema.”

¹⁶² Mpindyewu, dyambedi, netwênzè mwakenzaYe: kwenza disambila bwa kwondopa babeedi.

¹⁶³ Pashiishe, netwangate dipà dinene: Mâyì mmamana kulongolola, lwa paanyima apa, bwa ewu yônsò udi muswe kubatijiibwa (kudi bilâmbà muntwemu bwa bakaji, bilâmbà

muntwemu bwa balume), mamana kulongolola bwa nwènu kupeta dilekelediibwa dya mpekaatu yenu; bwalu nwavulukaayi ne, nudi mwa kupeta dilekelediibwa dya mpekaatu yenu anu bilondeshile dilongesha dya Bible. “Bwalu kakwena dîngà Dîna dipa bantu mwinshi mwa Dyulu, munudi ne cya kusungidiibwa.”

¹⁶⁴ Pôlò wakatuutakeena ne bakwabo bakaavwa bamane kubatiijiibwa. Nenku bavwa beela mbila, bapete bucimunyi. Yèyè ne: “Nwákabàtiijiibwa mu dibatiiza kaayi?”

Bôbò ne: “Dya Yone.”

Yèyè ne: “Yone uvwa ubatiiza bwa kanyinganyinga.” Mpindyewu, umvwayi eci nenku: bwa kanyinganyinga, kacivwa bwa dilekelediibwa dya mpekaatu to. Mbanganyi badi bumvwa aci? Kacivwa bwa dilekelediibwa dya mpekaatu to. Bavwa babatiijiibwe bîmpè, bwa kanyinganyinga. Bakaavwa banyingalale: “Eyo, mukalenge, nkaadi munyingalale. Mêmè, ndi ngitabuuja ne Yèyè ulwalwa.” Bavwa babatiijiibwe *bwa kanyinganyinga*; mbwena kwamba ne, “kwitabuja Mukalenge Yesu Kilisto.”

¹⁶⁵ Pashiishe mbenze anu bumvwa *aci* (ne Mulambu ukaavwa mumane kulwa), baakabatiijiibwa cyakabidi, mu Dîna dya Yesu Kilisto. Ne pashiishe, baakapeebwa, paakabantentekelaye byanza, Nyuma Mwîmpè; nenku baakaakula mu myakulu ne baakamba biprofeta.

¹⁶⁶ Mpindyewu, neushintulule awu Mufundu mushindu kaayi? Funkunabi ne munu webe mwaba umwepele mu Bible ukaadiku muntu mufwidiibwe luse ku mpekaatu yende, mu Dipungila Dipyadipya, kadi mwikaleku mubatiijiibwe mu mushindu mukwabo pa kuumusha mu Dîna dya Yesu Kilisto.

¹⁶⁷ Ndeejebi mwaba nansha umwe mu Bible ukaadiku muntu mubatiijiibwe mu Dîna dya Taatu, Mwânà, Nyuma Mwîmpè. Anyi untwadile ku birô byanyi bwalu bulonda kampanda, bwalu bulonda bwa ekeleeziya budi buleeja mwaba ukaadiku muntu mubatiijiibwe mu Dîna dya Taatu, Mwânà, ne Nyuma Mwîmpè, too ne ku bidimu nkama isatu paanyima paa lufu lwa mupostolo wa ndekeelu, pàakadyënzà ekeleeziya wa Katolike bulongolodi.

¹⁶⁸ Mpindyewu, mêmè ndi ne mukanda wa les *Pères Pré-Nicéens*, ne ba... bafundi bônso baa maalu malonda, ne bikwabo, anu mu birô byanyi amu: maalu malonda a kale menemene, ne mansantu pa buloba ebu; bijaadiki bimwepele bidi kabiyi mwa kupangila bitudiku naabi.

¹⁶⁹ Balaayi mukanda wa *Mutúkumbudi Wa Mu Dyàlumingu*, anyi kateshismu kaa ekeleeziya wa Katolike, ne nubitangile bîmpè, cidibi byamba: “Bamwe baa ku beena Mishònyì pàmwäpa nebasungidiibwe, bwalu batu biinamine ku dilongesha dya Katolike: Bwalu Bible wabo udi wamba ne, ‘kubatiiza mu Dîna dya Yesu Kilisto,’ kadi tudi buumushe bujitu

buvwa pa ‘Dîna dya Yesu,’ kadi kubuteeka pa ‘Taatu, Mwânà, Nyuma Mwîmpè,’ ne bôbò biine mbiitabe ciine aci.”

Mpindyewu, undeeje Mufundu udi ubengangana ne cyôci aci.

¹⁷⁰ Nunku ke bwalu abu’s. Nunku nansha nanku, baa pa buloba mbiinamine ku cyôci aci. Mbwa cinyi? Kabatu banji kufikaku kacya ku Kâlvariyo to. Ke mudi bwalu nanku. Kacya kabatuku banji kumona to.

¹⁷¹ Nebakwelulwile ne nebakutwe mênà . . . nebakutwe nansha dîna dya ne, “Munsantu mubunguluki wa mu malaba,” “mwena Yesu Nkaayende,” ne mênà ônsò a bakoleshi baa maalu adibo mwa kukutwa awu. Paakutwabo miine mênà awu bidi bishintulula cinyi? Cyakenzelabo . . . Yèyè wakamona nansha bu ne kudi bwalu paakaMutwabo mênà anyi? Wakapoopediibwa pa nkuruse. Wakiikala ne mwoyi bwa Nzambi, ne bwa Nzambi nkaayende. Nunku piikala Nyuma umweumwe awu, uvwa pambidi Pende awu, mwikale munda mwebe, s’neakwenzeje cintu cimwecimwe aci: kwangata Dîna Dyende. “Cyônsò cinwenzà,” (mudi Bible wamba) “mu dyakula anyi mu cyenzi, enzaayi byônsò mu Dîna dya Yesu, biikale nufila butumbi kudi Nzambi.”

¹⁷² Kunudi nupetela adi dilongesha dya nzambi isatu mu umwe, dya bampangaanu nkwepi? Mmu kateshismu kampanda, kî mmu Bible to. Mwaku mwine “busatu” kabeenaku nansha bawuteele mu Mifundu yônsò to kubangila anu ku Genese too ne ku Bwakabuulwibwa. Cintu bu nanku kacituku to. Cintu bu ne nzambi wa busatu kacituku to. Yèyè udi Nzambi, Nzambi nkaayende, Nzambi umwepele. Yèyè udi kwônsò eku anu Nzambi umwepele. Mmwenze mudimu mu midimu isatu: Wakenza mudimu musangu bu Taatu, pa Môsà. Wakenza mudimu musangu mu mubidi, bu Mwânà, Yesu. Udi wenza mudimu mpindyewu bu Nyuma Mwîmpè. Kadi n’Nzambi umwepele. Nzambi umwepele, kayi ne mênà asatu to. Midimu isatu. Midimu isatu, myânzù isatu mu Dîna dimwepele: Yesu Kilisto.

¹⁷³ Cintu cyônsò cidi cishiilangane mbumpangaanu; ne mêmè ndi ndomba bwa muntu aleeje cyôci aci, piikalabi ne ki neyôci to. Mmwômò. Nkaadi mwambambe cyôci aci kukaadi bidimu ne bidimu ne bidimu, ne kî nkwanji kwikalaku muntu nansha umwe ukaadi mukokanganepu to, kacya (Nwamonu anyi?), bwalu kacya mwa kwikalaku to. Ndi ne . . . dyambedi, Bible nyèyè ewu; ne kudi maalu malonda a kale bwa kujaadika ne mbulelela menemene. Kadi mbwa cinyi budi dyabulu . . .? Mêmè . . . Ee, Bible ngwâkamba ne bôbò nebiikale mushindu awu: “Nebalwe munyi, pângikalà Mêmè nciyi mubakoke?” Ke cyanyi paanyi cîndi mumanye pa bwalu abu aci. Ke cyakamba Yesu, pa nanku . . .

174 Ncyêna ngamba nanku bwa kwikala... Bu mêmè mwa kwamba nanku, mwikale nyiisha diyishi bu nunku ewu, ndi mufwanyine kwikala mwena lubombo wa ciipanshi menemene munkaci mwenu. Ncyá bushuwa. Ndi ngamba nanku bwalu Cidi Bulelela ne Cidi Mwoyi. Bûngì bwònsò bwa baakabatiijibwa mu Kilisto abu, cidi cibateeka pa Kilisto. Badi ne Mwoyi, ku Dîná Dyende.

175 Tudi tusambila mu Dîná Dyende, tukeba bintu mu Dinà Dyende, tuyiisha mu Dîná Dyende, tubatiiza mu Dîná Dyende, twikala ne mwoyi mu Dîná Dyende, tufwa mu Dîná Dyende, tuya mu Dyulu mu Dîná Dyende, tubiika ku lufu mu Dîná Dyende. “Famiye mujima mu Dyulu udi ubiikidiibwa ne n’Yesu.” Bible ngudi mwambe nanku awu ne: “Famiye mujima mu Dyulu udi ubiikidiibwa ne n’Yesu.” Yêyè wakamba ne: “Ndi mulwe mu Dyanyi. . .”

Wêwè udi wamba ne: “Ee, kadi’s n’Dîná dya Taatu.”

Taatu kî ndîná to, mmwânzù. Yêyè wakamba ne: “Ndi mulwe mu Dîná dya Taatu Wanyi, kadi nwênù kanwena baNgakidile to.” Mpindyewu, mmu Dîná kaayi mwakalwaYe? Eyowa’s. Bushuwa: “. . . kadi kanwena baNgakidile to.”

176 Nanku’s ke wêwè awu; bidi anu, eyo, mbisokoka beena lungenyi ne beena meeji. Cya bushuwa, mbisokoka bushuwa, eyo.

177 Ne mu Bwakabuulwibwa, bu mutwalongeshi dituku adi: kudi ekeleeziya ndumba wa kale, udi mwikale bulongolodi bwa kumpala; ne pathiishe kupetaye musumba wa bânà baa bakaji baakalediibwa kudiye. Badi benza cintu anu cimwecimwe aci, ciibidilu cimwecimwe aci. Ndekeelu wa byònsò bôbò bônsò badi bakuupuka anu mu Baabulona, mushindu anu umweumwe awu, biikale ne. . . biikale ne ekeleeziya wa Loomo ne nsangilu wa ekeleeziya ya—ya bukwabisamba; nenku ke yêyè awu, bônsò biikale bakuupuka, bônsò mu cintu cimwecimwe, mu bwâtù bumwe.

178 Kadi Ekeleeziya wa Nzambi (Aleluuyah!), ng’Ekeleeziya mubiikila bwa kupatuka, mutapuluke. Ekeleeziya mmwibaka bishi? Mmuni muwamanya ciine eci? Mmuni mùdì mwa kumanyaku ne eci ke Bulelela? Mpadi Nzambi ukubuulwilaci. Mmuni—mmuni mwakamanya Abele ne bivwa bikengela mwânà wa mukooko pamutu paa bimuma bya pommès? Baakamubuulwilaci: “Kû diitabuuja Abele wakalambula Nzambi mulambu mutambe bwîmpè.”

179 PakaavwaYe utuuluka ku Mukuna wa Dishintuluka dya mpala, Yesu udi wamba ne: “Bantu badi bamba ne Mêmè ndi nganyi?”

Bamwe kwamba ne: “Eliya,” “Môsà,” ne bikwabo.

Yèyè ne: “Kadi ndi nnukonka nwênù: ‘Nudi nwamba ne Mémè ndi nganyi?’”

Peetelo ne: “Udi Kilisto, Mwânà wa Nzambi udi ne mwoyi.”

¹⁸⁰ Yèyè ne: “Bwa eci kwênàku mucilonge to. . .” Mu mushindu mukwabo (Ndi ngamba eci, kî mbwa kudileeja mûndi munene to, kadi bwa kupoopela musonso kuwubweja bikole): “Bwa eci kwênàku mucilongele mu seminere kampanda to; kî mmuntu kampanda mukulongeshe eci to; kadi Taatu Wanyi, udi mu Dyulu, ngudi mukubuulwile eci: NDI awu (pa kuumusha Taatu, Mwânà, ne Nyuma Mwimpè to, kadi Mémè Ndi Yesu Kilisto). Ne pa lubwewe elu (Ndubwewe kaayi alu? Lumwelumwe kwakaya Abele aku; pa lubwebwe lumwelumwe alu.), pa lubwebwe elu, Bulelela bwa Nzambi bwa nyuma bubuulula, nêngìbakilèpu Ekeleeziya Wanyi, ne biibi bya ku mwaba wa bafwe kabyakumutamba bukole to.” Ke mudibi. Bôbò badi bateeta ciine aci, kadi kabaadyakutambaku bukole to. Nwamonu anyi?

¹⁸¹ Pa nanku wêwè nda anu ku Kâlvariyo, upoopediibwe ku nkuruse, walukile, kadi wàsè lwendu ulonde njila pamwe ne banyaabanya badyombola baa Mukalenge, utungunuke uye.

¹⁸² Mpindyewu, Mukalenge, nyewu tukaadi tuKulambula bintu byônsò. Ncyèna mumanye, munkaci mwa musumba ewu, ne cidi mwômò ncinyi to. Ncyèna ne cingenyinyenyi cya kumanyaku to, Mukalenge, anu Wêwè mucibuulule. Nenu mpindyewu, Taatu Nzambi, ncyèna nKulomba bwa kucyenza to. Nyewu ngáfumu ku dicyela bantu pambidi. Ke bôbò abu. Anyishaku bwa eci ciikale Kâlvariyo kaa menemene mu dinda emu; ciikaleku didipoopela dya muntu yèyè mwine pa nkuruse, ne ku majinga a muntu yèyè mwine, ne ku bintu binene bya mu nsômbelu.

¹⁸³ Anyishaku bwa bantu biikale badipwekeshe, ne dijinga dya kulonda njila pamwe ne banyaabanya badyombola baa Mukalenge. Biikale benda mu kudipwekesha. Balediibwe mu Bukalenge ebu, mu Bukalenge bunene bwa Nzambi ebu, budi bwikale mubidi wa nyuma, mubidi wa mu dyulu wa Kilisto pa buloba: “Ku Nyuma umwe tudi bônsò babatiijilwe mu mubidi umwe.”

¹⁸⁴ Enzaku bwalu abu, Mukalenge. Nansha biikale bafiike, batooke, baa kalaabi, bafiikuluke, anyi biikale baa bishi, balume anyi bakaji, bapika anyi badishikamine: mbatwénzè bônsò bwa kunwa ku Nyuma umweumwe awu.

¹⁸⁵ Enzaku bwalu abu, Taatu, ne ciikaleku ne. . . munkaci mwa bààbûngì, mu dinda emu, bwa bafike ku dyumvwa; anyishaku ukangule cyumvwilu cyabo. Pashiishe, neciikale bu dituku dipyadiya kudibo: dîbà nediteeme, nenku kaabukênkè kaa kaamunyiimunyi kaa dimamanyina dya Nzambi mu tulaasa dikwatakaja kudi bantu aku nekabwucidile, nenku Bukênkè bwa Nzambi nebutookeshe mu kajila kaabo, ne nebande cilàmbà

cikudika aci cidi cijike ebu Bukênkè bwîmpè kumona ebu. Nenku badi mwa kwendela mu cibeeba cya cijila, pa dîbà adi, biikale ne mwoyi bwa bakwabo, bu mwakenza Kilisto.

¹⁸⁶ Mpindyewu bu mutukaadi tubweja mulongo wa babeedi, ndi ndomba bwa Wêwè kulaaba basadidi Beebe mu dinda emu, twêtù bônso, patudi tusambila apa, tusambidilangana muntu ne muntu. Nenku enzaku, leelu ewu, bwa ne mubeedi yônso wapicila mu mulongo wa babeedi ewu ondopiibwe. Enzaku bwa yêyè wâpingana, anu bu muvwa kânà kaa bakaji kavva ne mèsù a bulèngù, ne kânà kaa balume aku, ne... ne inâbânzà mushindame awu, ne—ne Mwaneetu Wright, ne bààbûngì baakapicilamu abu, Mukalenge, biikale ne ntatu ne mabeedi ne cintu kampanda civwa bangangabuka kabayi mwa kwondopa to; nenku ke bôbò aba leelu ewu (kukaadi anu bu lumingu lujima nanku awu), nenku ke bôbò aba, ne bukole bwa mubidi, leelu ewu.

¹⁸⁷ Nzambi, enzaku bwa balume ne bakaji bààbûngì bapicilemu ne diitabuuja dimwedimwe adi, bamanye ne bayaaya ku Kâlvariyo bwa kupopeediibwabo pa nkuruse ku meei abo ne bingenyingenyi byabo bya ne kwondopiibwa kwabo nkumane “kupicila cikondo.” Enzaku bwa bukole bwakajuula Yesu mu lukita abu bubape mwoyi, mwoyi munene wa diitabuuja.

¹⁸⁸ Nenku pashiishe, dyakamwe paanyima paa cyôci eci, enzaku bwa ne bààbûngì balwe ku ciina cya mâyi a dibatiiza. Tudi tulomba, mu Dînâ dya Yesu. Amen.

¹⁸⁹ Mpindyewu, tudi anu ne tusunsa makumi abidi cyanaana bwa kupicisha mulongo wa babeedi ne mudimu wa dibatiiza. Mpindyewu katwena ne twarta twa disambila to. Tukaadi buumuke ku aci, nenku netuteete bwa kucyenza mu masangisha aanyi a manene menemene kwônso kutwikala mwa kuâbangila aku. Nkaadi munwâmbile bônso ne, tudi bacilongolole, tudi naaci pa mikaba ya mêyi, nenku kwônso kûndi nya, mikaba ya mêyi ayi nebyadyanjile kuyituma.

¹⁹⁰ Cimanyinu citu cifunkuna anu bwa kuleeja dibenesha. Cingenyeni civwa ne: “Wêwè usambidila babeedi, fikisha bantu ku dikwitabuuja.”

Mêmè kwamba ne: “Kî mbafwanyineku kungitabuuja to.”

Yêyè ne: “Neupeebwe bimanyinu ebi, nenku bwa byôbi ebi nebiitabuuje.” Bimanyinu mbyende misangu ne misangu, munda mwa bidimu dikumi mu nyungulukilu wa buloba, kabiyi bipangilaku musangu nansha umwe to. Kabiyi bipangilaku to, nansha kakese, mu cyôci aci. Mbanganyi badi bamanye ne ncyá bushuwa?

¹⁹¹ Ee, wêwè mwa kwitabuuja cimanyinu, nanku itabuuja Mukenji. Mmwômò. Ke udici cileeja. Ne Nzambi mmufwanyine kuteeka Mukenji munda mwanyi (Ne kwenza bwa kwikalawu mupwangane mushindu awu, kadi kakuyi...) kadi mêmè

nwambila cintu cifwanyine kwikala cya mafi anyi? Nzambi kēna mwa kundekela ngenza nanku to. To, to. To, mukalenge. Cīndi nwwambila eci m’Bulelela.

¹⁹² Mpindyewu, nwēnù bōnsò badi baswe banusambidile, bu mudi, mu ewu mulongo udi apa ewu, vwilaayi ku elu luseke, nwēnù baswe, kwaka naka, eġelaayi mulongo ku dyabalume. Nenku aci necipe bantu mushindu wa kupicilamu patudi tusambila. Pashiishe netwangate nso—nsongalume, ba-huissiers ne bakwabo nebiikale batangila; nenku padibo benda balwa bwa kupicila apa nenku, pashiishe lwa ku elu luseke, netubatume biikale banyungulukila lwa paanyima, ne netubapicishilemu. Muntu ne muntu nebamusambidile.

¹⁹³ [Muntu mukwabo udi wakula ne Mwaneetu Branham—Muf.] Kaa, to, bwālà. Ncyēna mwambe nanku to. Ee, dībà dyōnsò dinwaswa adi. Kabyena byenza bwalu to. Udi mwa kupatuka nende pambelu anyi, anyi udi . . . Ndi mwa . . . patukaaku nende pambelu lwa kwaka naka mpindyewu, anyi paapitaku katanci kakese, dībà dyōnsò dyaswaye adi, kabyena anu ne bwalu to.

¹⁹⁴ Mpindyewu, tushaalaayi batuuje ndambu, munda mwa ndambu wa tusunsa tudi tulonda etu. Ndi muswe bwa nwēnù bōnsò kwela meeji mpindyewu: Mpindyewu, ncinyi cidi—ncinyi cidi Bible mwambe? “Disambila dya diitabuuja nedisungile mubeedi.” Mbanganyi badi bamanye ne mmwômò? Mbanganyi badi bamanye ne Bible mmwambe ne: “Bimanyinu ebi nebifile badi biitabuuja. Byenzedi bīndi ngenza nenūbyēnzē peenu”? Nenku bivwa mbyenzedi kaayi? Yēyē wakamba ne: “Ndi mwa kwenza bu wēwē mwa kwitabuuja ne Ndi ne bukole bwa kucyenza.” Mmwômò anyi?

Lukonko lwanyi luvwa bishi? “Kabaakungitabuuja to.”

Yēyē ne: “Bimanyinu ebi nebibafikishe ku diitabuuja.”

¹⁹⁵ Mpindyewu, wēwē witabuuja, dilongōlōlā: Dyebe dībà dya kusungidiibwa ndyedi. Disungidiibwa anu dimwedimwe adi bu mudi dya ku mpekaatu, mmulayi umweumwe wa Nzambi umweumwe awu.

¹⁹⁶ Mpindyewu, nyewu tudi ne mukaji mukese, mubeedi kaaba aka, mwikale ne disaama dya cifu, mufumine ku New Albany. Netumusambidile, yēyē dyambedi, bwa yēyē kumona mwa kupeta—kupeta kaaba kaa kusōmba. Mpindyewu, bitekete bitekete, ne bantu bōnsò, mpindyewu. Ndi muswe bānà beetu baa balume bankwacisheku, mwab’ewu. Nenku twinyikaayi mitu yetu katanci, mpindyewu, bwa kusambila.

¹⁹⁷ Mpindyewu, Taatu wa mu Dyulu, eci civwa n’Diyi Dyebe. Kī mmēmē udi wambula bujitu bwa cyenzedi ciikala mwa kwenzeka pa dyōdi to, kadi ndi mwambule bujitu anu bwa kudiyiisha. Ne bu mūndi mumanye ne (ne bu mūndi mumanye ne nkaadi muntu mushindame mpindyewu, ne dituku kampanda nēngīmanē kumpala Kwebe): Ngaayiishi Bulelela byumukila

mu mwoyi wanyi. Wèwè udi mumanye nanku. Kabiyi bwa kwikala cipumbishi to, bu byôbì nanku, Mukalenge, nanku's bidi binkengela kanyinganyinga.

¹⁹⁸ Nenku Taatu, ndi nKulomba bwa ukwacishe, mpindyewu, patudi tubanga kusambidila babeedi apa, enzaku ne masambila aanyi apete dyandamuna, kî ng'anu aanyi masambila to, Mukalenge, kadi disambila dya ekeleeziya ewu, bu mudi bantu badi bakwate ne bya luse aba... Amba tûng udi mwimane ewu bu yèyè mwikale mukajaanyi? Amba tûng bu ne nyèyè, udi musômbe mu dikalu dya balema dyadya? Anyi yààyanì? Mamwānyì? Kaa, Nzambi, ondopa bantu aba. Udi mwanishe anyi's, Mukalenge?

¹⁹⁹ Tangila, badi biimane mu mulongo wa babeedi aba: disaama dya mwoyi, kansere, cyûjà, mabeedi ne ntatu bya mishindu yônsò. Bààbûngì baabo benda balwa (nkama ya kudibo mbasungidiibwe, anu mwaba ewu mene, Mukalenge), ne badi bamona cyôci aci, ne mbacitâbùùje, ne badi balwa mu mulongo wa babeedi bwa kwitaba dyabo dyondopa. Badi balwa ku Dibwe didi ne mwoyi mpindyewu, kî nkudi musadidi Webe to, kadi kudi Mwânà Webe, Yesu, Yèyè udi Mulombodi wa Ekeleeziya, Mupersona wa mu nyuma, musokome awu munkaci mwetu. Nenku bu mutukaadi tuya, bwa kulambula Dîna Dyende (Wèwè wâkamba ne: "Mu Dîna Dyanyi nebiipate badémons."), ndi ndomba bwa Wèwè wandamune masambila etu, mu Dîna dya Yesu. Amen.

²⁰⁰ Mpindyewu, bantu bônsò basambile. Mpindyewu, eci ke cyebe citupa, wèwè peebe. Eci ke dyebe peebe disambila.

Mpindyewu mukaji mutekete ewu udi ne cya kufwa, piikala Cintu kampanda kaciyi cimukwacishe.

²⁰¹ Mbanganyi badi bamanye Mwaneetu Stadsklev? Mwaneetu wa balume ne Mwaneetu wa bakaji Stadsklev? Mbambiikile ku Allemagne misangu isatu diloolo adi; mwanaabo wa mu diboko uvwa mufwe. Bavwa bakonka ne: "Mwaneetu Branham, tukaadi bakumone, ku Nyuma wa Nzambi, mubiishe bafwe," (Bavwapu biimane baditangidile bwalu abu. Nwamonu anyi?) "ne tudi bamanye ne wèwè udi muprofeta wa Mukalenge. Amba wèwè anu Dîyì."

Mêmè kwamba ne: "Ncyêna mwa kwamba to, anu anu dîyì adi diteekiibwe mukana mwanyi."

"Lwâku mu Allemagne." Mêmè kujuuka panshi lubilu. Nenku bôbò kubiikila ku telefone ne: "Angata kandeke kaa lukasa kadi mwa kukufikisha mu Allemagne mu mèbà asambombo." Kandeke kaa lukasa kaa basalaayi kavwa mwa kungambula kamfikisha ku Allemagne bwa kubiisha ku lufu mwânà wa mu diboko mumane kufwa. Kandeke kaa lukasa kaa basalaayi kavwa mwa kukamfikishaku munda mwa mèbà

asambombo, kuumukila mu Louisville too ne München, mu Allemagne.

202 Mémè kubwela mu nzubu, kutwa binù, kwamba ne: “Taatu, cîndi ne cya kwamba ncinyi? Akwila mukana mwanyi.” Kayi ungandamuna to. Mémè kupatuka kuya mwitu, kwamba ne: “Taatu, cîndi ne cya kwamba ncinyi? Teeka mêyi mukana mwanyi. Cyanaana, nênye mu cijengu.” Mémè kwalukila, Yêyè kayi anu mungandamune to. Mémè kubwela. Mémè kusambila bufuku bujima abu ne: “Mukalenge, teeka mêyi mukana mwanyi.” Dyandamuna nansha dya kânà.

203 Paakacyabu mu dinda ke mukajaanyi kujuuka. Mmwenze anu ujuuka, Dîyi (Mémè kujuuka kuulu), Yêyè ne: “Kutandishi eci to. Ncyanza cya Mukalenge.” Eyowa’s.

Ke mémè lubilu ku telefone ne: “Ncyêna mwa kulwa to. To, ncyanza cya Mukalenge. Mbafwanyine kunkandika.” Nudi numona bukole budiku pa ditandisha adi anyi? Paakamba Nzambi ne: “Kwenji nanku to, bwalu ncyanza cya Mukalenge.”

204 Mpindyewu, Môsà, musangu kampanda, baakamwambila bwa kenji cintu kampanda, nansha nanku kuyaye anu kacyenza. Nudi bavuluke? Nenku mémè—mémè ncyakaya to.

205 Nenku ndi mufwanyine kunutwadila tubeji tufunda mêyi mamba bwa bantu banaayi bashiilangane, ne, bambe kudi bangangabuka ne mbafwe, paanyima paa dibasambidila ne ditandisha dya lufu. Nwamonu anyi? Tudi twimana mwômò amu bwa kutandisha cintu aci. Nenku Nzambi mukupe bukole bwa kwenza cintu kampanda, bikengela wikale mudimuke bwa cyûdi wenza. Nwamonu anyi? Bikengela wikale mudi- . . . Yêyè kwamba ne: “Ku . . .”

206 Mpindyewu, vulukaayi ne, udi mucifwanyine kwikala wêwè kuyi mufike ku dicyumvwa menemene to, kadi bwanyi mémè civwa cyumvwija cintu kampanda. Nwamonu anyi?

“Kutandishi eci to.” Ne Dîyi disheeme, dya kalolo (pa dîbà bu isambombo ne citupa, ngela meeji mpa dîbà adi, dîbà isambombo ne citupa mu dinda amu) dyamba ne: “Kutandishi eci to. Ncyanza cya Mukalenge.”

Mémè ne: “Twasakidila, Taatu. Twasakidila, Mukalenge. Ncyakucyenza to.”

207 Bu Yêyè mwambe ne: “Tandisha eci. Mmulwishi mudifinde.”

Mvwa mwa kwamba ne: “Tuyaayi.” Nunku ncyenjiibwe.

208 Pavwa mwânà mukese wa balume wa mu Finlande awu mulaale panshi kuntu kwaka apu, mufwe, mudyata kudi mashinyi, kakuyiku nansha mufuba mujima mu mubidi wende to, Mukalenge kwambaye ne aci civwa ncyanza cya Sataana, wamba ne: “Citandisha.”

209 Nenukù mêmè kwamba ne: “Wêwè lufu, kwèna mwa kumulama nansha. Mupingaja, mulekelela.” Anu mwaba awu, kutupika kwimanyinaye kuulu, ee, kakuyiku mufuba nansha umwe mucibuke mu mubidi wende to. Ke Dîyi dya Mukalenge ndyadi. Ncyèna mwa kukwata mudimu ne Dîyi dya Mukalenge to padi Dîyi dya Mukalenge kadiyi dilwe kùndi.

210 Kadi mu Mifundu, Dîyi dya Mukalenge ndîmpè mudimu wa kwenza wa kusambidila babeedi aba; ndikupe peebe mudimu wa kubasambidila. Mpindyewu, “disambila dya diitabuuja nedisungile mubeedi;” tusambilaayi, inyikaayi mitu yenu; netumone cidiYe wamba, panudi nupita apa.

211 Udi mwena Kilisto, mmwômò anyi? Udi witabuuja ne mwoyi webe wônsò ne Yesu neakwondope anyi? Udi usaama ndambu wa cifu; ukaadi mucisaame kukaadi bidimu, wêwè mwaneetu wa bakaji. Mpindyewu neûmvwè bîmpè, pawikala mwitabuuje.

212 Mpindyewu, Mukalenge Nzambi, nsongakaji ewu udi ne cya kufwa amba anu Wêwè mumwondope. Mpindyewu ndi ndomba, pândi mumutangile apa, ncyèna mmona bwa cinyi udi mwa kufwa to.

Ne ndi ndyumvwa mu nyuma wanyi, Mukalenge, ne ndiswa Dyebe dyûdi mwanyishile, mpindyewu, bwa ne ntandishe cyôci eci: Wêwè Sataana, mulekelela!

Mu Dînà dya Yesu Kilisto, yêyè ùmvwè bîmpè, alwe ku ekeleeziya eku, afile bujaadiki bwa butumbi bwa Nzambi. Amen.

213 Mpindyewu, bipeepele anu mudibi amu, inăbànzà, wêwè's neûmvwè bîmpè. Udi witabuuja nanku anyi wêwè mwaneetu wa balume ewu?

[Mwaneetu Branham udi useemena kule ne cikolokolo—Muf.] Udi witabuuja wêwè udi apa ewu ne, neûmvwè bîmpè anyi?

Ndaaku mpindyewu, ubange kwikala udya cyônsò cyûdi . . . ciwaswa aci, ùmvwè bîmpè.

Mpindyewu, udi mutekemene bwa kutuuta maalu a pa buloba dikofi, ne kuâtèngununa; avwa makutuute dikofi, ne mmakutèngunune wêwè. Mpindyewu, Nzambi wa mu Dyulu udi uumusha dikofi Dyende adi ku maalu a pa buloba bwa kukupa dilekelediibwa dya mpekaatu, ku Dînà dimwedimwe adi, udi mwa kukupa dilekelediibwa dya mpekaatu, kuumusha dikofi adi pambidi peebe, ne kukwondopa.

Udi witaba ne Yêyè udi mwa kwondopa dituuta dya mwoyi adi anyi? Udi witabuuja nanku, ne newondopiibwe . . . ? . . .

214 Mukalenge Yesu, mukaji udi mukwate ne bya luse ewu udi ne cya kwikala kacya anu washaala mu dikalu edi matuku ende ônsò a mwoyi adi mashaale ne pathiishe, kuumushiibwaye pa buloba. Kadi tudi tulomba bwa bukole bwa Sataana ebw

buumushiibwe pambidi pende. Enzaku bwa yêyè ikale ne mwoyi ne endele kuulu ne ikale mukumbanangane anu mwende ne kale. Tudi tucilomba mu Dîna dya Yesu. Amen.

²¹⁵ Udi witabuuja anyi? Mmudimu mujikija, mmumana kwenza. Mbwalu kaayi ebu? Kakuyi bwôwà, kakuyi... Kacivwa...? Uvwa mwondopiibwe ku kansere musangu kampanda...?... Lekelela, fila byônsò kudi Yesu.

²¹⁶ Mukalenge Yesu, nyewu ntentekela mukaji ewu cyanza ne ntandisha disaama dyende. Ndi mumanye ne mmwena Kilisto, mulediibwe kudi Nyuma. Ndi ndyumusha pambidi pende, mu Dîna dya Dîna didi dikemesha. Amen.

²¹⁷ Mukalenge Nzambi, bwa mwanaabo wa balume wa mushinga mukole, ndi ndomba disungidiibwa dyende mu Dîna dya Yesu. Ikala wêwè mwimanyine pa cyôci aci. Amen. Neciye.

²¹⁸ Udi mudilongolole bwa kupeta dyondopiibwa dyebe, wêwè mwanaanyi wa balume? Mbîmpè, byamanyi kuya ku Cyende cyanza.

²¹⁹ Mukalenge Yesu, pa nsongalume ewu, yêyè udi mwambe, bifumina kûdi Wêwè, ne udi usambila bwa kupeta dyondopa dyende. Mêmè bu musadidi Webe, nyewu mmutentekela byanza mu Dîna dya Yesu Kilisto...?... Amen.

Mpindyewu, anu...?...mpindyewu, wêwè soka anu Dîna Dyende. Mpindyewu, kakuyi—kakuyi kûndi mêmè to...?...

²²⁰ Taatu Nzambi, anu muvwa mwânà wa balume wâkeeyemena mu cyâdi cya mamwëndè musangu kampanda, mamwëndè mwikale umutuuta tuumapi ne—ne usambila nende mwikale mukwate kaacyanza kende kakese pacivwaye mwânà wa mu diboko wa utatakana ne dyakula apu. Mpindyewu, Sataana nyewu wamwedi mu lupitaadi lwa bapâle. Nzambi, nyêyè ewu mulwe kudi Ekeleeziya wa cijila wa Nzambi udi ne mwoyi, Ekeleeziya udi mulediibwe kudi Nyuma wa Nzambi, Ekeleeziya udi Nyuma wa Nzambi musòmbèle munda mwende, mwikale udimanyisha Yêyè mwine. Nenku lelu ewu, ku disambila, tudi tusungila mukaji awu ku lupitaadi alu. Mu Dîna dya Yesu Kilisto, mmutudi tulomba emu. Amen.

Alukila mwebe, ukaadi bîmpè.

Twasakidila bwa difika dyebe, mwikale ulomba bwa mamwêbè; ke mwânà wa balume wa bushuwa nyawu.

²²¹ Ke dyebe dituku dya disungidiibwa ndyedi. Mukalenge Yesu, bwa ewu inâbânzà, bwa disungidiibwa dya bayende ne disungidiibwa dya muminu wende pende, enzaku abipete mu Dîna dya Yesu Kilisto, Yêyè udi wamba bwa “kulwa, kwitabuuja cyôci aci mpindyewu,” ne cyôci ncintu cimana kujikija.

²²² Mukalenge, bangangabuka nyewu bambe mêyì abo, Mukalenge, cidi mu mubidi wende, ciikale cimubwela mu dîsù. Nyewu mulwe bwa kusungidiibwaye, mubândile ku cyoshelu

eku, padi Ekeleeziya wa cijila ewu usambila apa, ndi ndomba disungidiibwa dyende mu Dîna dya Yesu Kilisto, lutatu elu neluumuke pambidi pende. Mmudimu mumana kujikija.

Bwa mwanende wa balume, ndi mbenesha mushwala ewu. Enzaku bwa dyumvwa ne ngiikadilu mwîmpè byalukile mu dici dyende...?...

²²³ Mpindyewu Ekeleeziya udi wakula; mpindyewu Ekeleeziya m’Mubidi musokome wa Kilisto. Tudi bônso tunusambidila. Nwamonu anyi? Katwena—katwena tujikula twamba kabidi ne tudi pa buloba to. Katwena twakula twamba bwa didyela dya nkonko ya kutuyaaya to. Tukaadi bamane kupeta Njila awu. Mu Njila awu ke mutudi balediibwe. Tudi Ekeleeziya wa Nzambi udi ne Mwoyi (citupa cyende); mu bushuwa bwa bwalu, yêyè mmutangalake pa buloba bujima. Kadi ewu mmusumba wa ku bôbò abu. Leelu, tudi badisangishe mu Dîna Dyende. Tudi balwe kwenza cyakambaYe ne, twênzè. CidiYe kayi mwa kubuulula patudi tudisangisha. Kusambidila babeedi, tubatentekela byanza, “disambila dya diitabuuja nedisungile mubeedi.”

²²⁴ Disaama dyebe dya mwoyi adi dikushiile mwaba. Mu Dîna dya Yesu Kilisto, ndi ntumikila ku mudimu udi Nzambi mumpe bwa kwenza...?...



DITÛKÛ ADI KU KÁLVARÌYÒ LUA60-0925
(That Day On Calvary)

Diyiisha edi dya Mwaneetu William Marrion Branham, dyakayiishiibwa mu dyalumingu mu dinda, dya 25 a ngondo wa citeema, 1960, mu Branham Tabernacle mu Jeffersonville, Indiana, U.S.A., ndyumusha pa mukaba wa mêtì ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2015 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org